

冕

服

考

冕服考卷三

江都焦廷琥學

衮冕以下至元冕公侯卿大夫降服有差皆謂之裋冕
觀禮侯氏裋冕 注云裋冕者衣裋衣而冠冕也裋
之爲言埤也天子六服大裘爲上其餘爲裋以事尊
卑服之而諸侯亦服焉上公衮無升龍侯伯鷩子男
毳孤絺卿大夫元此差司服所掌也 疏云裋讀從
詩政事一埤益我取裋陪之義天子六冕以大裘爲
上無裋義衮冕以下皆爲裋云
玉藻裋冕以朝 注云朝天子也裋冕公衮侯伯鷩
子男毳也

樂記裋冕搢笏

注云裋冕衮之屬也

曾子問大祝裋冕

注云裋冕絺冕元冕也

廷珉按公侯卿大夫之冕皆謂之裋冕鄭注裋之言卑也賈疏以爲取裋陪之義荀子富國篇大夫裋冕注云裋之爲言卑也以事尊卑服之禮論篇云裋冕黼黻文織注裋之言卑也天子六服大裘爲上其餘爲卑左傳裋謚漢書古今人表作卑謚則裋之義通於卑也鄭司農第以驚冕爲裋衣與經不合宜陳用之以爲拘也

上公自衮冕九章而下其服五衮冕有降龍無升龍

典命上公九命爲伯其國家宮室車旗衣服禮儀皆

以九爲節

司服公之服自衮冕而下如王之服

鄭氏覲禮注上公衮無升龍 疏云上公衮無升龍

者白虎通引禮記曰天子乘龍載大旗象日月升龍
傳曰天子升降諸侯降龍以此言之上得兼下下不
得僭上則天子升降俱有諸侯直有降龍而已若然
彼升龍文承大旗之下知不施於旌旗而據衣服者
案司常云交龍爲旂又云諸侯建旂注云諸侯畫交
龍一象其升朝一象其下復則旌旗升降俱有而白
虎通云諸侯降龍者據衣服而言

公之衮冕衣五章裳四章爲將覲釋幣於禩之服

覲禮侯氏裨冕釋幣於禰 注云禰謂行主遷主矣
而云禰親之也釋幣者告將覲也其釋幣如聘大夫
將受命釋幣於禰之禮既則祝藏其幣歸乃埋之於
祧西階之東 疏云案玉藻諸侯元冕以祭不得服
衮冕以下而此裨冕釋奠於禰者以將入天子之廟
故服之也

爲朝覲之服

玉藻裨冕以朝 注云朝天子也裨冕公衮侯伯鷩
子男毳也

爲從王大祭祀服

司服公之服自衮冕而下如王之服 注云自公之

衮冕至卿大夫之元冕皆其朝聘天子及助祭之服
又爲魯祭文王周公之服又爲二王之後自祭之服又
爲二王後與魯祭天之服

司服注云諸侯非二王後其餘皆元冕而祭於己

疏云案玉藻注云諸侯祭宗廟之服惟魯與天子同
此注云諸侯非二王後其餘皆元冕祭於己彼不言
二王後此不言魯者彼此各舉一邊而言其實相兼
乃具也魯雖得與天子同唯在周公文王廟中得用
衮冕若餘廟亦元冕或可依公羊傳魯公與羣公別
牲而用駢剛則其服宜用鷩冕可也其二王後唯祭
受命王得用衮冕其餘廟亦用元冕也

節服氏賈疏云諸侯惟二王後與魯得祭天服衮冕其餘諸侯惟得祭宗廟服元冕

玉藻注云諸侯祭宗廟之服唯魯與天子同疏云唯魯與天子同者明堂位云君卷冕立於阼夫人副翟立於房中是也此謂祭文王周公之廟得用天子之禮其祭魯公以下則亦元冕

公之鷩冕衣三章裳四章爲從王享先公饗射之服楊信齋儀禮旁通圖云上公自衮冕而下其服五侯伯自鷩冕而下其服四子男自毳冕而下其服三若助祭則隨事用之如王祭羣小祀元冕則助祭者亦元冕是也若朝王則各服其服如上公衮冕侯伯鷩

冕是也

又爲魯祭魯公之服

見司服疏

公之毳冕衣三章裳二章爲從王中祭祀之服公之希冕衣一章裳二章爲從王祭社稷五祀之服

公之元冕衣無文裳刺黻爲從王羣小祀之服又爲自祭宗廟之服

玉藻諸侯元端以祭 注云祭先君也端亦當爲冕字之誤也

又爲親迎之服

昏禮鄭注云大夫以上親迎冕服 疏云士家自祭

服元端助祭用爵弁今爵弁用助祭之服親迎一爲攝盛則卿大夫朝服以自祭助祭用元冕亦當以冕攝盛也若上有孤之國孤絺冕卿大夫同元冕侯伯子男無孤之國卿絺冕大夫元冕也孤卿大夫士爲臣卑復攝盛取助祭之服以親迎則天子諸侯爲尊則袞矣不須攝盛宜用家祭之服則五等諸侯元冕以家祭則親迎不過元冕天子親迎當服袞冕矣郊特牲元冕齋戒鬼神陰陽也疏云案昏禮士用上服以爵弁爵弁是士服之上者則天子以下皆用上服以五冕色俱元故總稱元冕也

廷琥按賈疏以五等諸侯不過元冕孔疏以爲天

子以下皆用上服之冕與賈不同

侯伯自鷩冕七章而下其服四

典命侯伯七命其國家宮室車旗衣服禮儀皆以七爲節

司服侯伯之服自鷩冕而下如公之服

侯伯之鷩冕爲朝天子之服又爲將覲釋幣於廟之服又從王鷩冕以上之服侯伯之鷩冕從王服侯伯之絺冕從王服侯伯之元冕從王服又爲自祭宗廟之服又爲親迎之服

子男自毳冕五章而下其服三

典命子男五命其國家宮室車旗衣服禮儀皆以五

爲節

司服子男之服自毳冕而下如侯伯之服

子男毳冕爲朝天子之服又爲將覲釋幣於禰之服又爲從王毳冕以上之服子男絺冕從王服子男元冕從王服又爲自祭宗廟之服又爲親迎之服

王之三公服鷩冕而下其服四若加一等得服衮冕其鷩冕爲助王祭之服其毳冕爲從王射之服其絺冕亦從王服

典命王之三公八命其卿六命其大夫四命及其出封皆加一等

王制三公一命卷若有加則賜也 注云三公八命

矣復加一命則服龍袞與王者之後同多於此則賜非命服也 疏云言王者制度三公八命身著鷩冕若加一命則爲上公與王者之後齊同而著袞冕故云一命袞 又云三公司服無文按射人三公執璧與子男同則服毳冕也

陳氏祥道禮書云大射王服七章之鷩冕故三公執五命子男之璧執五命子男之璧則五章之毳冕矣王降袞冕以接賓三公降鷩冕以從王卿大夫而下不降故執其等之擊服其等之服 又云王之三公鷩冕纁八就前後各八旒旒八玉用玉一百二十八執圭射則執璧書曰周公秉圭以冕觀之蓋執信圭

先儒曰執桓圭 又云王之三公八命其卿六命其大夫四命及其出封皆加一等蓋八命加一等則是三公一命卷而衣服以九爲節也其未出封則八命與侯伯同七章之命矣公與侯伯同七章之服則卿六命與子男同五章之服矣觀司服孤之服自希冕而下如子男之服卿大夫之服自元冕而下如孤之服公之孤四命而服三章之希冕大國之卿三命大夫再命而服一章之元冕則王之公卿大夫其衣服各降命數一等可知也

其元冕爲親迎之服又爲從王聽朔之服又爲郊勞諸侯之服

王之孤卿毳冕其服三若加一等得服鷩冕其毳冕希冕皆從王服其元冕爲親迎之服又爲從王聽朔之服典命賈疏云孤亦得名卿故匠人云外有九室九卿朝焉是并六卿與三孤爲九卿亦得名卿者以其命數同也

廷琥按典命卿六命不言孤孤亦卿也陳氏禮書孤卿同毳冕楊信齋之說亦同近武進張太史惠言儀禮圖王之孤服希冕王之卿大夫服元冕合卿大夫爲一與周禮六命四命之文相戾矣王之卿大夫元冕與諸侯之卿大夫同一制乎說多不合當以陳氏之說爲是

王之大夫絺冕其服二絺冕爲從王助祭之服元冕爲親迎之服又爲從王聽朔之服若加一等則得服毳冕詩大車毳衣如蒺毛傳云天子大夫四命其出封五命如子男之服

諸侯入爲王官仍服其服

詩大車毳衣如蒺鄭箋云古者天子大夫服毳冕以巡行邦國而決男女之訟則是子男入爲大夫者疏云古天子大夫服毳冕以決訟則是其人於禮自得服之緣此服之貴賤準其官之尊卑解得服之所由故云則是子男入爲大夫者也王朝之卿大夫出封於畿外褒有德加一等使卿爲侯伯大夫爲子男

其諸侯入於王朝爲卿大夫者以其本爵仍存直以入仕爲榮耳不復更加其命數故侯伯入爲卿子男入爲大夫諸侯之數眾王朝之官少或亦侯伯爲大夫非唯子男耳左傳曰滕侯曰我周之卜正顧命孔安國注云齊侯呂伋爲天子虎賁氏是侯伯入爲大夫者也以其本爵先尊服其本國之服故鄭志答趙商云諸侯入爲卿大夫與在朝仕者異各依本國如其命數是由尊諸侯使之以其命此陳子男爲大夫仍得服毳冕也

公之孤希冕其服二

司服孤之服自希冕而下如子男之服

典命公之孤四命以皮帛眡小國之君其卿三命其大夫再命 注云視小國之君者列於卿大夫之位而禮如子男也鄭司農云九命上公得置孤卿一人春秋傳曰列國之卿當小國之君固周制也孤之希冕爲聘於王朝之服又爲助祭之服

司服注云自公之袞冕至卿大夫之元冕皆其朝聘天子及助祭之服 疏云卿大夫聘天子受之在廟及助祭亦申冕服可知故鄭君臣朝聘並言也

廷琥按司服注明言自袞冕至元冕皆其朝聘天子及助祭之服則孤卿之冕服爲聘於天子及助祭之服明矣孤卿大夫助祭於公用元冕不得用

希冕若非助祭於天子則希冕將何用乎張太史
惠言儀禮圖不知希冕爲聘於天子之服又謂次
國之卿助君祭不得希冕未聞所用誤矣

孤之元冕爲助君祭之服

雜記大夫冕而祭於公弁而祭於己

又爲親迎之服侯伯子男之卿亦如之

昏禮賈疏云上公有孤之國孤絺冕卿大夫元冕侯
伯子男無孤之國卿絺冕大夫元冕也

廷琥按張太史惠言儀禮圖以次國之卿與孤並
言用賈疏也又以子男卿大夫同服元冕不已自
異其說乎

公之卿大夫服元冕爲聘於天子與助祭之服又爲助祭於公之服又爲親迎之服侯伯大夫再命亦如之于男大夫一命亦服元冕而無旒

典命賈疏云王制之文多據夏殷此命卿亦是夏殷法故彼下文大國之卿不過三命下卿再命小國之卿與下大夫一命鄭注云不著次國之卿者以大國之下互明之此卿命則異大夫皆同以此言之則大國卿三命次國卿與大國下卿同再命小國卿與大夫同一命彼注卽引此周禮命卿大夫之法以證與古不同之義若然此引彼夏殷命臣法周禮諸侯卿大夫命雖與古不同五等諸侯國國皆有二卿得天

子命者與夏殷同故引之若然云大國三卿皆命於天子者上卿則命數足矣中卿天子再命已君加一命亦爲三命下卿天子一命若夏殷已君加一命二命足矣周則已君加二命爲三命足矣云下大夫五人不言命數者並不得天子命夏殷並已君加一命周則大國之大夫再命也云上士二十七人者夏殷之士不命其二十七士亦應有上九中九下九而皆云上士者亦是勉人爲高行故總以上士言之也云次國三卿二卿命於天子者上卿天子二命已君不加中卿天子一命已君加一命下卿天子不命已君亦加二命爲再命故云一卿命於其君是次國之卿

皆再命也若周禮次國卿並三命亦下大夫五人上士二十七人義與大國同也云小國二卿皆命於其君者案彼鄭注云此文似脫誤者類上文大國次國則此小國亦當有三卿宜云小國三卿一卿命於天子二卿命於其君則是脫亦三卿一卿命於天子九字矣云誤者次國云二卿命於天子不言皆此小國云二卿皆命於其君而言皆是誤故云蓋誤也若依此三卿解之則三卿之內一卿命於天子爲一命二卿命於其君亦各一命亦下大夫五人上士二十七人義與上同也若周禮小國三卿皆再命亦一卿命於天子一命已君加一命爲再命二卿命於其君不

得天子命並已君再命矣又周法次國五大夫亦與大國五大夫同再命小國下大夫五人各一命其士公侯伯之士同一命子男之士不命與夏殷同此文是也大司馬云大國三軍次國二軍小國一軍軍將皆命卿者謂得天子之命者得爲軍將也若然諸侯之臣有四命三命再命一命不命而經云各砥其命數者謂宮室之等四命者四百步貳車四乘旗四旂冕服四章三命者以三爲節再命一命者亦以命數爲降殺也但大夫元冕一命者一章裳上刺黻而已衣無章故得元名也則冕亦象衣無旒

冕服有黻制與繹同長三尺下廣二尺上廣一尺天

子直公侯前後方大夫前方後挫角士前後正天子之士則直諸侯之士則方其色天子朱韍諸侯黃朱大夫素若大夫助祭於君則用元冕則赤韍士無韍若助祭於君服爵弁則纁韍而韎韐也韍色皆如其裳之色

玉藻君韠朱大夫素士爵韋 注云此元端服之韠也 又圓殺直 注云目韠制 又天子直 注云

四角直無圓殺 又公侯前後方 注云殺四角使之方變於天子也所殺者去上下各五寸 又大夫前方後挫角 注云圓其上角變於君也韠以下爲前以上爲後 又士前後正 注云士賤與君同不嫌也正直方之間語也天子之士則直諸侯之士則

方 又釋下廣二尺上廣一尺長三尺其頸五寸肩
革帶博二寸 注云頸五寸亦謂廣也頸中央肩兩
角皆上接革帶以繫之肩與革帶廣同凡佩繫於革
帶 疏云經云圓則下文大夫前方後挫角則圓也
經云殺則下文公侯前後方方則殺也經云直則下
文云天子直是目鞞制也經云前後方是殺四角也
上下各去五寸所去之處以物補飾之使方變於天
子也云所殺者去上下各五寸者按雜記云鞞會上
去五寸是上去五寸又云紕以爵韋六寸不至下五
寸是下去五寸鄭注雜記云會謂上領縫也領之所
用蓋與紕同如鄭此言卽上去五寸是領也以爵韋

爲領故云領之所用與紕同下云所去五寸紕以素故鄭注雜記云純紕所不至者五寸然則上去五寸是領也下去五寸是純也若然唯去上畔下畔而云殺四角者蓋四角之處別異之使殊於餘邊也其會之下純之上兩邊皆紕以爵韋素裏各三寸故雜記云韠長三尺下廣二尺上廣一尺會去上五寸紕以爵韋六寸不至下五寸純以素紕以五采韠制大略如此

又一命縕黻幽衡再命赤黻幽衡三命赤黻蔥衡

注云此元冕爵弁服之韠尊祭服異其名耳縕赤黃之間色所謂韠也周禮公侯伯之卿三命其大夫再

命其士一命子男之卿再命其大夫一命其士不命
疏云諸侯黃朱色淺亦名赤韍則大夫赤韍色又
淺耳

明堂位有虞氏服韍夏后氏山殷火周龍章 注云
韍冕服之韠也舜始作之以尊祭服禹湯至周增以
畫文後王彌飾也山取其仁可仰也火取其明也龍
取其變化也天子備焉諸侯火而下卿大夫山士韠
章而已韍或作黻 疏云有虞氏服韍者直以章爲
韍未有異飾故云服韍夏后氏畫之以山殷人增之
以火周人加龍以爲文章

雜記韠長三尺下廣二尺上廣一尺會去上五寸紕

以爵韋六寸不至下五寸純以素紃以五采 注云
會謂領上縫也領之所用蓋與紃同在旁曰紃在下
曰純素生帛也紃六寸者中執之表裏各三寸也紃
純所不至者五寸與會去上同

詩朱芾斯黃 鄭箋云芾者天子純朱諸侯黃朱

左氏桓二年傳衮冕黻珽 注云黻韋韠以蔽膝也

疏云黻韠制同而名異鄭詩箋云芾大古蔽膝之
象也冕服謂之芾其他服謂之韠以韋爲之故云黻
韋韠也詩云赤芾在股則芾當是當股之衣故云以
蔽膝也鄭氏易緯乾鑿度注云古者田漁而食因衣
其皮先知蔽前後知蔽後後王易之以布帛而獨存

其黻前者重古道而不忘本也是說黻韠之元由也
明堂位云有虞氏服韍言舜始作韍也尊祭服而異
其名耳未必此時始存象也知冕服謂之黻者易云
朱紱方來利用享祀知他服謂之韠者案士冠禮士
服皮弁元端皆服韠是他服謂之韠以冕爲主非冕
謂之他此欲以兩服相形故謂黻爲韠韠黻之與韠
祭服他服之異名耳其體制則同玉藻說元端服之
韠云韠君朱大夫素士爵韠發首言韠句末言韠明
皆以韠爲之凡韠皆是裳色言君朱大夫素則尊卑
之韠直色別而已無他飾也其韍則有文飾焉明堂
位云有虞氏服韍夏后氏山殷火周龍章鄭氏云韍

冕服之韠也舜始作之以尊祭服禹湯至周增以畫文後王彌飾也山取其仁可仰也火取其明也龍取其變化也天子備焉諸侯火而下卿大夫山士韠韋而已是說韠之飾也玉藻曰韠下廣二尺上廣一尺長三尺其頸五寸肩革帶博二寸鄭氏云頸五寸亦謂廣也頸中央肩兩肩皆上接革帶以繫之肩與革帶廣同是說韠之制也記傳更無韠制皆是韠義明其制與韠同經傳作韠或作韠或作芾音義同也徐廣車服儀制曰古者韠如今之蔽膝戰國連兵以韠非兵飾去之漢明帝復制韠天子赤皮蔽膝蔽膝古韠也然則漢世蔽膝猶用赤皮魏晉以來用絳紗爲

之是其古今異也

說文市釋也上古衣蔽前而已市以象之天子朱市
諸侯赤市大夫慙衡篆文作鞞士無市有韜制如楮
缺上四角爵弁服其色韜賤不得與裳司農云裳纁
色韜或从韋

廷琬按玉藻一命纁紱幽衡再命赤鞞幽衡三命
赤鞞慙衡鄭注此元冕爵弁服之韜明堂位有虞
氏服鞞鄭注鞞冕服之韜也則鞞之制與韜同矣
玉藻韜君朱大夫素士爵韋鄭氏詩箋云芾君朱
諸侯黃朱此天子以下鞞之色也玉藻一命纁鞞
再命三命赤鞞大夫有三命再命一命士有一命

大夫不以素士不以爵韋者此以助祭言之卿大夫朝服以自祭助祭用元冕士助祭服爵弁故大夫得有赤韍士得有纁韍也纁韍卽韎韐合韋爲之染以茅蒐因以名焉韍之色如裳之色冕服之裳俱用纁故韍用赤再命三命服赤帶諸侯亦赤帶詩赤帶在股赤帶金舄以其皆纁裳也但天子朱韍色深黃朱則略淺赤則更淺耳玉藻韍下廣二尺上廣一尺長三尺頸廣五寸肩革帶博二寸雜記韍長三尺下廣二尺上廣一尺會去上五寸紕以爵韋六寸不至下五寸純以素紕以五采此天子以下韍制之尺寸韍亦如之也領上縫曰會

會去上五寸此五寸謂之領在下曰純凡五寸會之下純之上兩旁曰紕紕表裏各三寸韠三尺去上五寸爲領去下五寸爲純則中央長二尺天子朱諸侯黃朱大夫素卽此二尺之色耳雜記言紕以爵韋鄭氏謂領之所用與紕同則亦以爵韋也雜記言純以素鄭注素生帛也此諸侯以上之飾也素韠爵韠則不然張太史惠言云冠禮朝服素韠特性記云朝服元冠緇帶緇韠旣同是朝服不應於韠有殊據緇帶者實練帶紕之以緇謂之緇帶則緇韠蓋素韠而純以緇也由是差之大夫素韠紕以緇純以爵士爵韠紕純皆以緇與玉藻云

天子直公侯前後方大夫前方後挫角士前後正
鄭氏謂天子四角直無圓殺公侯殺四角使之方
變於天子也所殺者去上下各五寸大夫圓其上
角變於君也韞以下爲前以上爲後士賤與君同
不嫌也正直方之間語天子之士則直諸侯之士
則方此天子諸侯大夫士韞制之式韞亦如之也
按殺四角使之方殺者削也於上領下純之四角
削之使前純後領方也天子不殺則前純後領不
方前後方則四角必削之而以物補飾之補處有
縫故孔疏云別異之使殊於餘邊也大夫前方後
挫角前方與公侯之前方同後挫角角本直也挫

而使之圓則上兩角爲圓形天子直則不圓故鄭云圓其上角變於君也孔疏謂別異之者指公侯前後方而言前方則第前兩角別之後兩角旣挫而爲圓形不必以物補飾無所謂別異之也張太史惠言謂大夫後兩角亦別異之誤矣其所作大夫前方後挫角圖上角不圓亦與經注不合說文士無市有輪製如榼缺四角爵弁服玉藻士前後正鄭注天子之士則直諸侯之士則方孔疏云直而不袤謂之正方而不袤亦謂之正陳氏禮書云缺四角則與後挫者不同所以其體正也士缺上下諸侯方而不挫天子直而不方此尊卑之辨也

明堂位有虞氏服黻夏后氏山殷火周龍章天子
繪龍火山諸侯繪火山大夫繪山則又天子以下
所繪之不同也

其帶有大帶天子素帶朱裏終辟諸侯素帶終辟大夫
素帶辟垂

玉藻天子素帶朱裏終辟而素帶終辟大夫素帶辟
垂士練帶率下辟居士錦帶弟子縞帶並紐約用組
三寸長齊於帶紳長制士三尺有司二尺有五寸子
游曰參分帶下紳居二焉紳鞶結三齊大夫大帶四
寸雜帶君朱綠大夫元黃士緇辟二寸再繚四寸凡
帶有率無箴功 注云而素帶終辟謂諸侯也諸侯

不朱裏合素爲之率綽也士以下皆裨不合而綽積如今作幪頭爲之也辟讀如裨冕之裨裨謂以繒采飾其側人君充之大夫裨其紐及末士裨其末而已三寸謂約帶紐組之廣也長齊於帶與紳齊也結約餘也結或爲袵雜猶飾也卽上之裨也君裨帶上以朱下以綠終之大夫裨垂外以元內以華華黃色也士裨垂垂下外內皆以緇是謂緇帶大夫以上以素皆廣四寸士以練皆廣二寸再繚之凡帶有司之帶也亦綽之如士帶矣無箴功則不裨之士雖綽帶裨亦用箴功凡帶不裨下士也疏云天子素帶朱裏者以素爲帶用朱爲裏終辟辟則裨也終竟帶身在

要及垂皆裨故云終辟而素帶終辟者謂諸侯也以素爲帶不以朱爲裏亦用朱綠終裨大夫素帶辟垂者大夫亦用素爲帶不終裨但以元華裨其身之兩旁及屈垂者士練帶率下辟者士用孰帛練爲帶其帶用禪帛兩邊緯而已緯謂纒緝也下裨者但士帶帶至者必反屈向上又垂而下大夫則總皆裨之士則用緇唯裨向下一垂者居士錦帶者用錦爲帶尙文也弟子縞帶者用生縞爲帶尙質也並紐約用組者紐謂帶之交結之處以屬其紐約者謂以物穿紐約結其帶謂天子以下至弟子之等其所紐約之物並用組爲之故云並紐約用組三寸者謂紐約之組

闊二寸也長齊於帶者言約紐組餘長三尺與帶垂者齊故云長齊於帶子游曰三分帶下紳居二焉記者引子游之言證紳之長短人長八尺大帶之下四尺五寸分爲三分紳居二分焉紳長三尺也紳鞞結三齊者紳謂紳帶鞞謂蔽膝結謂約紐餘組三者俱長三尺故云三齊大夫大帶四寸謂合素爲之廣四寸士緇辟二寸再繚四寸謂用單練廣二寸繚繞也再度繞要亦四寸凡帶謂有司之帶有綵謂其帶旣褊亦以箴纁緝其側但綵褊之而已無別褊褊之箴功

雜記率帶諸侯大夫皆五采士二采 注云此謂襲

尸之大帶率綽也綽之不加箴功大夫以上更飾以五采士以朱綠 疏云率謂爲帶也但攝帛邊而熨殺之不加箴功異於生也 衛氏集說引山陰陸氏云言大夫以襲尸其帶皆以五采率之卽非襲尸無率也據士練帶率下辟

大戴禮黃帝黼黻衣大帶

左氏桓二年傳鞶屬游纓 注云鞶紳帶也一名大帶屬大帶之垂者 疏云大帶之垂名之曰紳紳是帶之名屬是垂之貌賈服等說鞶屬皆與杜同唯鄭氏獨異禮記內則注以鞶爲小囊讀屬如裂縐之裂言鞶囊必裂縐緣之以爲飾案禮記稱男鞶革女鞶

絲鞶是帶之別稱遂以鞶爲帶名言其帶革帶絲耳
鞶非囊之號也禮記又云婦事舅姑施鞶表表是囊
之別名今人謂裹書之物爲表言其施帶施囊耳其
鞶亦非囊也若以鞶爲小囊則表是何器若表亦是
囊則不應帶二囊矣以此知鞶卽是紳帶爲得其實
廷琥按凡帶有率無箴功鄭氏謂率綷也士以下
皆綷不合而綷積如今作幪頭也曰綷積則織時
爲之有自然之積故不須箴綫縫合之功士帶率
下辟率處無箴功而辟處尙有箴功惟下士則不
綷故無箴功也說文幪斂髮也蓋如今俗之所謂
包頭者其織處有蹙起之積卽鄭氏所謂綷積也

孔疏以綽爲纒緝有司之帶以箴纒緝其側但綽
稱之而已無別裨飾之箴功夫既纒緝之則有縫
合之迹何謂無箴功若謂無裨飾之箴功亦屬添
飾陳氏禮書亦謂率縫合之皆非鄭義也衛正叔
集說引嚴陵方氏云率者謂循其經緯而攝之也
又云凡帶率之而已故無用箴之功以縫之也近
張太史惠言云按疏云率者縫旁邊非也唯裨用
箴功則綽不縫明矣注云綽積者謂織帶時以兩
條繩置其邊而織之故破率爲綽以如碑綽也二
說於綽積之義爲合

又有革帶所以懸佩與韍

玉藻肩革帶博二寸 注云肩與革帶廣同凡佩懸於革帶 疏云以大帶用紐約其物細心不堪懸鞶佩故也

左氏桓二年傳帶裳幅舄 注云帶革帶也 疏云下有鞶是紳帶知此帶是革帶

陳氏祥道禮書云內則曰男子鞶革莊子曰帶死牛之脅玉藻曰革帶博二寸士喪禮鞶帶搢笏鄭氏曰鞶帶鞶鞶細帶不言鞶細者欲見鞶自有帶鞶帶用革笏搢於帶之右旁然則革帶其博二寸其用以繫佩鞶然後加以大帶而佩繫於革帶笏搢於二帶之間矣晉語寺人勃鞞曰乾時之役申孫之矢集於桓

鈎鈎近於袷而無怨言則革帶有鈎以拘之後世謂之鈎𦥑阮諶云𦥑蝗蝦鈎以相拘帶謂之鈎𦥑唐以玉爲鈎𦥑矣然革帶用於吉而已荀卿曰搢紳而無鈎帶是也古者褐衣象裘色釋屨象裘色而革帶與釋其用相因則革帶豈亦與釋同色與

有佩

玉藻古之君子必佩玉 注云君子士已上 又右徵角左宮羽 注云玉聲所中也 又趨以采齊行以肆夏周還中規折還中矩進則揖之退則揚之然後玉鏘鳴也故君子在車則聞鸞和之聲行則鳴佩玉是以匪僻之心無自入也君在不佩玉左結佩右

設佩 注云謂世子也結者結其綬不使鳴焉 又

居則設佩 注云謂所處而君不在焉 又朝則結

佩 注云朝於君亦結 又齊則綯結佩而爵韞

注云綯屈也結又屈之思神靈不在事也 又几帶

必有佩玉唯喪否 注云几謂天子以至士 又佩

玉有衡牙 注云居中央以前後觸也 又君子無

故玉不去身君子於玉比德焉天子佩白玉而元組

綬公侯佩山元玉而朱組綬大夫佩水蒼玉而純組

綬世子佩瑜玉而綦組綬士佩瑤珉而緼組綬 注

云玉有山元水蒼者視之文色所以也綬者所以貫

佩玉相承受者也純當爲緼古文緼字或作絲旁才

綦文雜色也。縹赤黃。疏云：凡佩玉必上繫於衡，垂三道，穿以纁珠，下端前後以懸於璜中央，下端懸以銜牙。動則銜牙前後觸璜而爲聲。所觸之玉其形似牙，故曰銜牙。皇氏謂衡居中央，牙是外畔兩邊之璜。以銜牙爲二物，若如皇氏說，鄭何獨得云牙居中央，以爲前後觸也？玉色似山之元，而雜有文似水之蒼，而雜有文，故云文色所似。但尊者玉色純，公侯以下玉色漸雜，而世子及士唯論玉質，不明玉色，則玉色不定也。又一命韍，韍幽衡，再命赤韍，幽衡三命赤韍，慈衡。注云：衡佩玉之衡也。幽讀爲黝，黑謂之黝，青謂之慈。

詩鄭風雜佩以贈之 注云雜佩者珩璜琚瑀衝牙之類 疏云珩佩上玉也璜半璧也琚佩玉名也瑀玖石次玉也衝牙亦玉爲之其狀如牙以衝突前後也

朱子詩集傳云右佩玉上橫曰珩下繫曰組貫以纁珠中組之貫一大珠曰瑀末懸一玉兩端皆銳曰衝牙兩旁組半各懸一玉長博而方曰琚其末各懸一玉如半璧而內向曰璜又以兩組貫珠上繫珩兩端下交貫於瑀而下繫於兩璜行則觸牙觸璜而有聲也

詩秦風瓊琚玉佩 疏云佩玉之制唯天子用純纁

侯以下則玉石雜用

詩小雅服其命服朱芾斯皇有瑋瑟珩 注云三命

瑟珩 疏云三命以上皆瑟珩也故云三命瑟衡明至九命皆瑟珩非謂方叔唯三命也

晉語白玉之珩六雙 韋昭云珩似磬而小

大戴禮保傅篇下車以佩玉爲度上有瑟衡下有雙璜衡牙玼珠以納其閒琚瑀以雜之 注云衡平也半璽曰璜衡在中牙在旁玼珠納於衡璜之閒玼亦作璵總曰玼珠而赤者曰琚白者曰瑀

廷琥按佩制上有玉曰衡如磬而小天子用白衡三命以至九命用瑟衡一命再命幽衡衡下垂三

道皆穿以玼珠中一道之中繫以玉曰瑀下垂繫以玉曰衝牙其狀如牙兩端皆銳左右衝下中繫以玉曰琚下垂曰璜璜半璧也又以兩組貫珠上繫衡兩端下交貫於瑀下繫於兩璜衡上有佩衿曰褱上繫於革帶此佩之制也天子諸侯大夫皆如此唯天子用白玉諸侯用山元玉大夫用水蒼玉其貫珠之組綬天子元諸侯朱大夫純此大夫以上冕服之佩也下此世子之佩用瑜玉組綬用綦士之佩用瑤珉組綬用縵世子當君在則結佩結其綬不使鳴也齊則精結佩精屈也旣結而又屈之也臣於君所佩必垂委而相必鳴玉是與世

子之禮異內則男子左佩紛悅刀礪小觶金燧右佩玦捍管遘大觶木燧婦左佩紛悅刀礪小觶金燧右佩箴管綫纈施鞶褱大觶木燧詩童子佩觿之巾也晴則取火於金燧陰則取火於木燧捍卽拾也可以捍弦管筆弮也遘刀鞞也以上諸佩因考冕服之佩而附載之

有笏天子以球玉杼上終葵首一曰珽或謂之大圭諸侯以象前詘後直大夫以魚須文竹前詘後詘凡笏皆搢於帶閒臣於君前將有指畫或書以記事則執之玉藻天子搢珽方正於天下也 注云此亦笏也謂

之琕琕之言琕然無所屈也或謂之大圭長三尺杼
上終葵首終葵首者於杼上又廣其首方如椎頭是
謂無所屈後則恆直相玉書曰琕玉六寸明自炤
又諸侯茶前詘後直讓於天子也 注云茶讀爲舒
遲之舒舒懦者所畏在前也詘謂圜殺其首不爲椎
頭諸侯惟天子詘焉是以謂笏爲茶 又大夫前詘
後詘無所不讓也 注云大夫奉君命出入者也上
有天子下有己君又殺其下而圜

又笏天子以球玉諸侯以象大夫以魚須文竹士竹
本象可也見於天子與射無說笏入太廟說笏無禮
也小功不說笏當事免則說之既摺必盥雖有執於

朝弗有盥矣凡有指畫於君前用笏造受命於君前則書於笏笏畢用也因飾焉笏度二尺有六寸其中博三寸其殺六分而去一 注云凡吉事無所說笏也殺猶杼也天子杼上終葵首諸侯不終葵首大夫士又杼其下首廣二寸半 疏云言既搢笏必盥者謂有執事於朝須預潔淨故既搢笏於帶必盥洗其手於後雖有執事於朝更不須清潔不須盥矣造受命謂造詣君前而受命則書記於笏笏畢用也者畢盡也謂事事盡用笏記之其中博三寸者天子諸侯上首廣二寸半其天子椎頭不殺也大夫士下首又廣二寸半唯笏之中央同博三寸故云其中博三寸

也其殺六分而去一者天子諸侯從中以上稍稍漸殺至上首六分三寸而去其一分餘有二寸半在大夫士又從中以下漸漸殺至下首亦六分而去一又年不順成君衣布摺本 注云摺本去珽茶佩士笏也士以竹爲笏飾本以象

又將適公所宿齋戒居外寢沐浴史進象笏書思對命 注云思所思念將以告君者也對所以對君者也命所受君命者也書之於笏爲不忘也 疏云史謂大夫亦有史官也熊氏曰按下大夫不得有象笏有象字者誤也

典瑞王摺大圭執鎮圭纁就五采五就以朝日

玉人大圭長三尺杆上終葵首天子服之 注云大

圭或謂之珽杆殺也終葵椎也爲椎於杆上明無所

屈也 疏云齊人謂椎爲終葵

禮器大圭不琢

左氏桓二年傳袞冕黻珽 注云珽玉笏也

內則子事父母鞶紳搢笏

樂記武王散軍而郊射裊冕搢笏而虎賁之士說劒

也

儀禮士緇帶韎韐竹笏

說文習一曰佩也象形

釋名笏忽也君有命則書其上備忽忘也

陳氏禮書云天子之於天下體無所屈故珽必方正諸侯之於天子則謹度以臣之於臣民則制節以君之故茶必前屈後直大夫於其君則爲臣於天子則爲陪臣故笏必前屈後屈士笏之制無所經見觀其飾之以象則亦前屈後直與 又云玉藻言笏度二尺有六寸其中博三寸其殺六分而去一然天子之笏長三尺而六寸爲椎首而計之則於二尺六寸爲有餘去椎首而計之則於二尺六寸爲不足蓋玉藻所言非天子之笏孔穎達曰二尺六寸短於天子蓋諸侯以下度分皆然 又云大夫之笏以魚須文竹鄭氏曰文猶飾也庾氏曰以鮫魚須飾竹以成文考

之書大傳曰東海魚須目鄭氏魚須今以爲簪司馬相如賦曰靡魚須之橈旃張揖曰以魚須爲旃柄則大夫以之飾笏宜矣

馬氏端臨云圭鎮寶也笏服飾也圭則執之以爲信笏則執之以爲飾晦菴言笏只是君前記事指畫之具不當執之於手然古者天子亦有笏豈亦藉此以記事指畫乎蓋朝章之服飾也但天子之笏以玉爲之其制以圭而天子與公侯伯之圭上銳下方其形類笏故後人或誤以圭爲笏然笏者非執則指不可須臾去身者也若圭則天子以禮神諸侯以朝見天子不過於當事之時暫捧之而卽莫之不常執也嘗

見繪禮圖者繪上公衮冕執桓圭在手如秉笏之狀是矣至卿大夫無圭璧則端冕盛服而執所謂羔鴈者在手殊爲可笑蓋誤以圭爲笏誤以鎮信之具爲服飾之具故也

有偏

詩采芣耶幅在下 毛傳云耶幅幅偏也所以自偏束也 鄭箋云耶幅如今行膝也偏束其脛自足至膝故曰在下 疏云杜鄭皆云今之行膝然則耶纏於足謂之耶幅 又云彼交匪舒文在耶幅之下明非舒之義出於耶幅之故云彼與人交接自偏束如此則非有懈怠舒緩之心天子以其如此故賜予之

言上章所得車服由諸侯非有舒緩故也此芾幅說
諸侯服之而來非天子賜以芾幅也天子所賜之服
亦必有芾幅隨之要此據諸侯自服爲文非天子所
賜故云自偏束如此

左氏桓二年傳帶裳幅舄 注云幅若今行膝 疏
云幅與行膝今古之異名故云若今行膝詩云邪幅
在下毛傳云幅偏也所以自偏束也鄭箋云邪幅如
今行膝也偏束其脛自足至膝膝訓緘也然則行而
緘足故名行膝邪纏束之故名邪幅

閻氏若璩尚書疏證云詩之邪幅緘袞伯所謂偏人
君之盛服也非行膝者比康成杜預時無復此制故

第曰若今行膝而已至內則之偏則常人之服也康成直注爲行膝不言若其密如此

琥按毛詩邪幅在下鄭箋亦云邪幅

如今行膝也

廷琥按詩諸侯朝天子有邪幅朝用裨冕則邪幅盛服也鄭康成謂偏其脛自足至膝則天子宜亦有偏然其制未聞陳氏禮書以偏爲朱色蓋亦從其裳之色耳

有舄冕服皆赤舄自天子至卿大夫同

履人掌王及后之服屨爲赤舄黑舄赤纁黃纁青句素屨葛屨

注云複下曰舄禪下曰屨古人言屨以

通於複今世言屨以通於禪俗易語反與舄屨有紉

有纁有純者飾也鄭司農云赤纁黃纁以赤黃之絲爲下緣士喪禮曰夏葛屨冬皮屨皆纁緇純禮家說纁亦謂以采絲縹其下元謂凡屨舄各象其裳之色士冠禮曰元端黑屨青紃纁純素積白屨緇紃纁純爵弁纁屨黑紃纁純是也王吉服有九舄有三等赤舄爲上冕服之舄詩云王錫韓侯元袞赤舄則諸侯與王同下有白舄黑舄王后吉服六韐祭服有舄元舄爲王后祿衣之舄也下有青舄赤舄鞠衣以下皆屨耳句當爲紃聲之誤也紃纁純者同色今云赤纁黃纁青紃緇互言之明舄屨眾多反覆以見之凡舄之飾如纁之次赤纁者王黑舄之飾黃纁者王后元

舄之飾青紉者王白舄之飾言縹必有紉純言紉必有縹純三者相將王及后之赤舄皆黑飾后之青舄白飾凡屨之飾如繡次也黃屨白飾白屨黑飾黑屨青飾紉謂之拘著舄屨之頭以爲行戒縹縫中紉純緣也天子諸侯吉事皆舄士爵弁纁屨黑紉縹純尊祭服之屨飾從纁也素屨者非純吉有凶去飾者言葛屨明有用皮時 疏云赤舄者男子冕服婦人闕翟之舄也 又云縹是牙底相接之縫綴條於其中紉謂屨頭以條爲鼻純謂以條爲口緣 又云王吉服有九者司服六冕與章弁皮弁冠弁是也云舄有三等謂赤舄黑舄白舄也赤舄是舄中之上是六冕

之舄也 又云白舄配韋弁皮弁黑舄配冠弁 又云王舄有三后舄不得過王但冕服有六其裳同故以一舄配之后翟三等連衣裳而色各異故三翟三等之舄配之元舄配褱衣則青舄配搖翟赤舄配闕翟可知下文命夫命婦唯言履不言舄故知鞠衣以下皆履也

履人辨外內命夫命婦之命履功履散履 注云命夫之命履纁履命婦之命履黃履以下功履次命履孤卿大夫則白履黑履九嬪內子亦然世婦命婦以黑履爲功履女御士妻命履而已士及士妻謂再命受服者散履亦謂去飾 疏云司服孤絺冕卿大夫

元冕皆以赤舄爲命舄以下仍有韋皮白履冠弁黑履故云次命履鄭志趙商問司服王后六服之制目不解請圖之答曰大裘裘衣鷩衣毳衣絺衣元衣此六服皆纁裳赤舄韋弁衣以韎皮弁衣以布此二弁皆素裳白舄冠弁服黑衣裳而黑舄冠弁元端禕衣元舄首服副從王見先王掄翟青舄首服副從王見先公闕翟赤舄首服副從王見羣小祀鞠衣黃履首服編以告桑之服褱衣白履首服編以禮見王之服祿衣黑履首服次以御於王之服后服六翟三等三舄元青赤鞠衣以下三履黃白黑婦人質不殊裳履舄皆同裳色也

詩豳風赤舄几几 傳云赤舄人君之盛履也几几
絢貌

又小雅赤芾金舄 傳云諸侯赤芾金舄舄達履也
箋云金舄黃朱色也 疏云言金舄達履者天官
屨人注云舄有三等金舄爲上冕服之舄下有白舄
黑舄此云金舄者卽禮之赤舄也故箋云金舄黃朱
色加金爲飾故謂之金舄白舄黑舄猶有在其上者
爲尊未達其赤舄則所尊莫是過故云達屨言是屨
之最上達者也此舄也而曰屨屨通名以舄是祭服
尊卑異之耳故屨人兼掌屨舄是屨爲通名也

左氏桓二年傳芾裳幅舄 注云舄複屨 疏云周

官屨人注複下曰舄禪下曰屨然則舄之與屨下有禪複爲異屨是總名故云舄複屨謂其複下也鄭氏又云天子諸侯吉事皆舄赤舄者冕服之舄白舄者皮弁之舄黑舄者元端之舄其士皆著屨纁屨者爵弁之屨白屨者皮弁之屨黑屨者元端之屨其卿大夫服冕者亦赤舄餘服則屨其王后禕衣元舄榆狄青舄闕狄赤舄鞠衣黃屨展衣白屨祿衣黑屨其諸侯夫人及卿大夫之妻合衣狄者皆舄其餘皆屨其舄之飾用對方之色赤舄黑飾是也屨之飾用比方白屨黑飾是也

廷琥按冕服用赤舄飾以黑絢纁純注疏言舄屨

制度極詳備載之

冕服考卷三終

冕服考卷四

江都焦延琥學

秦漢以後冕服制度畧載卷末俾初學者知其概焉
後漢志秦滅去禮學郊祀之服皆以衿元漢承秦故
晉志漢氏承秦改六冕之制但元冠絳衣而已

隋志秦除六冕唯留元冕

以上秦與西漢

除六冕之制
惟有元冕

後漢紀永平二年正月辛未宗祀光武於明堂帝及
公卿列侯始服冠冕衣裳玉佩紉屨以行事 注漢
官儀曰天子公卿特進諸侯祀天地明堂皆冠平冕
三禮圖冕以三十升布漆而爲之廣八寸長尺六寸

前下後高有倂伏之形董巴輿服志顯宗初冕衣裳以祀天地衣裳以元上纁下徐廣輿服注漢明帝案古禮備其服章天子郊廟衣皐上絳下前三幅後四幅衣畫而裳纁

後漢志世祖踐祚都於土中始修三雍正兆七郊顯宗遂就大業初服旒冕衣裳文章赤舄絢履以祀天地養三老五更於三雍於始致治平矣天子三公九卿特進侯侍祠侯祀天地明帝皆冠旒冕衣裳元上纁下乘輿備文日月星辰十二章三公諸侯山龍九章九卿以下華蟲七章皆備五采大佩赤舄絢履以承大祭

又冕冠垂旒前後遙延玉藻孝明皇帝永平二年
初詔有司采周官禮記尙書臯陶篇乘輿服從歐陽氏
說公卿以下從大小夏侯氏說冕皆廣七寸長一尺
二寸前圓後方朱綠裏元上前垂四寸後垂三寸係
白玉珠爲十二旒以其綬采色爲組纓三公諸侯七
旒青玉爲珠卿大夫五旒黑玉爲珠皆有前無後各
以其綬采色爲組纓旁垂黻纁郊天地宗祀明堂則
冠之衣裳玉佩備章采乘輿刺史公侯九卿以下皆
織成陳留襄邑獻之云

又古者君臣佩玉尊卑有度上有韋貴賤有殊佩所
以章德服之衷也韋所以執事禮之共也故禮有其

度威儀之制三代同之五伯迭興戰兵不息佩非戰器韍非兵旗於是解去韍佩留其係璲以爲章表故詩曰韠韠佩璲此之謂也韍佩旣廢秦乃以采組連結於璲光明章表轉相結受故謂之綬漢承秦制用而弗改加以以雙印佩刀之飾至孝明皇帝乃爲大佩衝牙雙瑀璜皆以白玉乘輿落以白珠公卿諸侯以采絲其視冕旒爲祭服云

東京賦整法服正冕帶珣紃縹玉笄綦會火龍黼黻藻綵鞶厲

徐廣車服儀制云戰國以韍非兵飾去之漢明帝復制韍天子赤皮蔽膝

王制疏凡冕之制皆元上纁下故注弁師云元覆朱
裏師說以木版爲中以三十升元布衣之於上謂之
延也朱爲裏以緇爲之案漢禮器制度廣八寸長一
尺六寸又董巴輿服志云廣七寸長尺二寸皇氏謂
此爲諸侯之冕應劭漢官儀廣七寸長八寸皇氏以
爲卿大夫之冕服也蓋冕隨代變異大小不同今依
漢禮器制度爲定

玉藻疏漢明帝時用曹褒之說皆用白玉旒珠

隋志秦除六冕唯留元冕漢明帝永平中始創制董
巴志云漢六冕同制皆濶七寸長尺二寸前圓後方

以上東漢

明帝本歐陽夏侯
之說復六冕之制

晉志漢承秦弊西京未有所制及明帝始采周官禮記尙書及諸儒記說還備袞冕之服天子之冕前後旒用眞白玉珠魏明帝改以珊瑚珠

又魏明帝以公卿袞衣黼黻之飾疑於至尊多所減損始制天子服刺繡文公卿服織成文晉遵而無改隋志魏晉以來非祀宗廟不欲令臣下服袞冕

馬氏端臨云魏氏多因漢法其所損益之制無聞

以上魏

改用珊瑚珠

晉志漢承秦弊西京未有所制及明帝始采周官禮記尙書及諸儒記說還備袞冕之服天子之冕前後旒用眞白玉珠魏明帝改以珊瑚珠晉初仍舊過江

服章多闕而冕飾以翡翠珊瑚雜珠侍中顧和奏改用白琰珠

又魏明帝以公卿袞衣黼黻之飾疑於至尊多所減損始制天子服刺繡文公卿服織成文晉遵而無改又平冕王公卿助祭於郊廟服之王公八旒卿七旒以組爲纓色如其綬王公衣山龍以下九章卿衣華蟲以下七章

通典東晉元帝初過江帝服多闕而冕飾以翡翠珊瑚珠侍中顧和奏舊禮冕旒用白玉珠今美石難得不能備可用白玉琰珠從之後帝郊祀天地明堂宗廟元會臨軒改服黑介幘通天平冕阜表朱綠裏廣

七寸長一尺二寸加於通天冠上前圓後方垂白玉珠十二旒以朱組爲纓無綏王公卿助祭郊廟冠平冕王公八旒卿七旒組爲纓色如綬也

以上晉

元帝時仍用白玉珠後改服黑介幘通天平冕卽平頂冠也平頂冠之制始於此

宋志天子禮郊廟則黑介幘平冕今所謂平頂冠也
皐表朱綠裏廣七寸長尺二寸垂珠十二旒以組爲纓衣皐上絳下前三幅後四幅衣畫而裳繡爲日月星辰山龍華蟲藻火粉米黼黻之象凡十二章也素帶廣四寸朱裏以朱綠裨飾其側中衣以絳緣其領袖赤皮蔽膝蔽膝古之韍也絳袴絳襪赤舄其臨軒亦袞冕也

又上公卿初祭於郊廟皆平冕王公八旒卿七旒以組爲纓色如其綬王公衣山龍以下九章也卿衣華蟲以下七章也

又劉向曰古者天子至於士王后至於命婦必佩玉尊卑各有其制禮記曰天子佩白玉而元組綬公侯山元玉而朱組綬卿大夫水蒼玉而緇組綬士佩璫玟而緇組綬緇赤黃色綬者所貫佩相承受也上下施鞅如蔽膝貴賤亦各有殊五霸之後戰兵不息佩非兵器鞅非戰儀於是解去佩鞅留其係璲而已秦乃以采組連結于璲轉相結受謂之綬漢承用之至明帝始復制佩而漢末又亡絕魏侍中王粲識其形

乃復造焉今之佩綬所制也皇后至命婦所佩古制不存今與外同制秦組綬仍又施之

又古者貴賤皆執笏其有事則搢之於腰帶所謂搢紳之士者搢笏而垂紳帶也垂三尺笏者有事則書之故常簪筆今之白筆是其遺象三臺五省二品文官簪之王公侯伯子男卿尹及武官不簪加內侍位者乃簪之手板則古笏矣尙書令僕射尙書手板頭復有白筆以紫皮裹之名笏朝服肩上有紫生袷囊綴之朝服外俗呼曰紫荷

以上宋

齊志宋明帝泰始四年更制五輅儀修五冕朝會饗

獵各有所服事見宋注舊相承三公以下冕七旒青玉珠卿大夫以下五旒黑玉珠永平六年太常丞何諲之議案周禮命數改三公八旒卿六珠尙書令王儉議依漢三公服山龍九章卿華蟲七章從之

又平冕黑介幘今謂平天冠皐表朱綠裏廣七寸長尺二寸垂珠十二旒以朱組爲纓如其綬色衣皐上絳下裳前三幅後四幅衣畫而裳繡爲日月星辰山龍華蟲藻火粉米黼黻十二章素帶廣四寸朱裏以朱綠裨飾其側要中以朱垂以綠垂三尺中衣以絳緣其領袖赤皮鞞絳袴袂赤舄郊廟臨朝所服也漢世冕用白玉珠爲旒魏明帝好婦人飾改以珊瑚珠

晉初仍舊後乃改江左以美玉難得遂用琤珠世謂之白琤珠

又袞衣漢世出陳留襄邑所織宋末用繡及織成建武中明帝以織成重乃采畫爲之加飾金銀薄世亦謂爲天衣

平冕各以組爲纓王公八旒衣山龍九章卿七旒衣華蟲七章並助祭所服皆畫皐絳縉爲之

又佩玉自乘輿以下與晉宋制同建元四年制王公侯卿尹珠水精其餘用牙蚌

以上齊

隋志梁制乘輿郊天祀地禮明堂祠宗廟元會臨軒

則黑介幘通天冠平冕俗所謂平天冠者也其制元
衣朱綠褱廣七寸長尺二寸加於通天冠上前垂四
寸後垂三寸前圓而後方垂白玉珠十有二旒其長
齊肩以組爲纓各如其綬色傍垂黹纁琬珠以玉瑱
其衣皐上絳下前三幅後四幅衣畫而裳繡衣則日
月星辰山龍華蟲火宗彝畫以爲纁裳則藻粉米黼
黻以爲繡凡十二章素帶廣四寸朱褱以朱繡裨飾
其側中衣以絳緣領袖赤皮爲韠蓋古之韍也絳袴
袼亦舄佩白玉垂朱黃大綬黃赤纁紺四采革帶帶
劍組帶以組爲之如綬色黃金辟邪首爲帶鐻而飾
以白玉珠

又臨軒亦服袞冕

又周捨議詔旨以王者袞服宜畫鳳皇以示差降按禮有虞氏皇而祭深衣而養老鄭元所言畫則是畫鳳皇羽也又按禮所稱雜服皆以衣定名猶加袞冕則是袞衣而冕明有虞言皇者是衣名非冕明矣畫鳳之旨事實灼然制可又王僧崇云今祭服三公衣身畫獸其腰及袖又有青獸形與獸同義應是雉卽宗弊也兩袖各有禽鳥形類鸞鳳似是華蟲今畫宗彝卽是周禮但鄭元云雉屬昂鼻長尾是獸之輕小者謂宜不得同獸尋冕服無鳳應改爲雉又袞有圓花於禮無礙疑是畫師加葩藻耳藻米黼黻並乖

古制今請改正並改圖花帝曰古文日月星辰此以一辰攝三物也山龍華蟲又以一山攝三物也藻火粉米又以一藻攝三物也是爲九章今袞服畫龍則宜應畫鳳明矣孔安國云華者花也則爲花非疑若一向畫雉差降之文復將安寄鄭義是所未允文帝曰禮王者祀昊天上帝則大裘而冕祀五帝亦如之又云莞席之安而蒲越藁秸之用斯皆至敬無文貴誠重質今郊用陶匏與古不異而大裘蒲秸獨不復存其於質敬恐有未盡且一獻爲質其劍佩之飾及公卿所著冕服可共詳定五經博士陸瑋等並云祭天猶存掃地之質而服章獨取黼黻爲文於義不可

今南郊神座皆用苧席此獨莞類未盡質素之理宜以藁秸爲下藉蒲越爲上席又司服云王祀昊天服大裘明諸臣禮不得同自魏以來皆用袞服今請依古更制大裘制可瑋等又尋大裘之制唯鄭元注司服云大裘羔裘也旣無所出未可爲據案六冕之服皆元上纁下今宜以元緇爲之其制式如裘其裳以纁皆無文繡冕則無旒制可

以上梁

隋志陳永定元年武帝卽位徐陵白所定乘輿御服皆採梁之舊制又以爲冕旒後漢用白玉珠晉過江服章多闕遂用珊瑚雜珠飾以翡翠侍中顧和奏今

不能備玉珠可用白玳從之蕭驕子云白玳蚌珠是也帝曰形制依此今天下初定務從節儉應用繡織成者並可彩畫金色宜塗珠玉之飾任用蟀也至天嘉初悉改易之定令俱依天監舊事然亦往往改革今不同者皆隨事於注言之不言者蓋無所改制云又卿大夫助祭則冠平冕五旒口口爲飾有前無後各以其綬采爲組纓旁垂黹纁衣元上纁下畫華蟲七章皆佩五采大佩赤舄絢履

以上陳

隋志自晉左遷中原禮儀多缺後魏天興六年詔有司始制冠冕各倣品秩以示等差然未能皆得舊制

至太和中方考故實正定前謬更造衣冠尙不能周
洽及至熙平二年太傅清河王懌黃門侍郎韋廷祥
等奏定五時朝服准漢故事五郊衣幘各如方色焉
及後齊因之河清中改易舊物著令定制云

以上後魏

隋志乘輿平冕黑介幘垂白珠十二旒飾以五采玉
以組爲纓色如其綬黹纁玉笄白玉璽黃赤綬五采
黃赤纁綠紺純黃質長二丈九尺五百首廣一尺二
寸小綬長三尺二寸與綬同采而首半之袞服皐衣
絳裳裳前三幅後四幅織成爲之十二章綠絳中單
織成纁朱紱佩白玉帶鹿盧劍絳袴袼赤舄

又四時祭廟園丘方澤明堂五郊封禪大雩出宮行事正旦受朝及臨軒拜王公皆服袞冕之服

又皇太子平冕黑介幘垂白珠九旒飾以三采玉以組爲纓色如其綬金璽朱綬四采赤黃纁紺綬朱質長二丈一尺三百二十首廣九寸小綬長三尺二寸與綬同色而首半之袞服同乘輿而九章絳紱佩瑜王玉具劍火珠標首絳袴袜赤舄非謁廟則不服又諸公卿平冕黑介幘青珠爲旒上公九三公八諸卿六以組爲纓色如其綬衣皆元上纁下三公山龍八章降皇太子一等九卿藻火六章惟郊祀天地宗廟服之

通典北齊采陳之制旒玉用五采以組爲纓色如其
綬其四時郊祀封禪大事皆服袞冕

以上北齊

隋志後周設司服之官掌皇帝十二服祀昊天上帝
則蒼衣蒼冕祀東方上帝及朝日則青衣青冕祀南
方上帝則朱衣朱冕祭皇帝祇祀中央土帝則黃衣
黃冕祀西方上帝及夕月則素衣素冕祀北方上帝
祭神州社稷則元衣元冕享先皇加元服納后朝諸
侯則象衣象冕十有二章日月星辰山龍華蟲六章
在衣火宗彝藻粉米黼黻六章在裳凡十二等享諸
先帝大貞於龜食三老五更享諸侯耕藉則服袞冕

白龍已下凡九章十二等宗彝已下五章在衣藻火
已下四章在裳衣重宗彝祀星辰祭四望視朔大射
饗羣臣巡犧牲養國老則服山冕八章十二等衣裳
各四章衣重火與宗彝羣祀視朝臨太學入道法門
宴諸侯與羣臣及燕射養庶老適諸侯家則服鷩冕
七章十二等衣三章裳四章衣重三章袞山鷩三冕
皆裳重黼黻俱十有二等通以升龍爲領標冕通十
有二旒 諸公之服九一曰方冕二曰衮冕九章宗
彝已上五章在衣藻已下四章在裳三曰山冕八章
衣裳各四章衣重宗彝爲九等四曰鷩冕七章衣三
章裳四章衣重火與宗彝五曰火冕六章衣裳各三

章衣重宗彝及藻裳重黻六日毳冕五章衣三章裳
二章衣重藻粉米裳重黼黻山冕已下俱九等皆以
山爲領褾冕俱九旒 諸侯服自方冕而下八無袞
冕山冕八章衣裳各四章鷩冕七章衣三章裳四章
衣重宗彝火冕六章衣裳各三章衣重藻裳重黻毳
冕五章衣三章裳二章衣重粉米裳重黼黻鷩冕已
下俱八等皆以華蟲爲領褾冕俱八旒 諸伯服自
方冕而下七又無山冕鷩冕七章衣三章裳四章火
冕六章衣裳各三章裳重黻毳冕五章衣三章裳二
章裳重黼黻火冕已下俱七等皆以火爲領褾冕俱
七旒 諸子服自方冕而下六又無鷩冕火冕六章

衣裳各三章毳冕五章衣三章裳二章裳重黻毳冕
已下俱六等皆以宗彝爲領標冕俱六旒 諸男服
自方冕而下五又無火冕毳冕五章衣三章裳二章
以藻爲領標冕五旒 三公之服九一曰祀冕二曰
火冕六章衣裳各三章衣重宗彝與藻裳重黻三曰
毳冕衣三章裳二章衣重藻與粉米裳重黼黻四曰
藻冕四章衣裳俱二章衣重藻與粉米裳重黼黻五
曰繡冕三章衣一章裳二章衣重粉米裳重黼黻俱
九等皆以宗彝爲領標 三孤之服自祀冕而下八
無火冕毳冕五章衣三章裳二章衣重粉米裳重黼
黻藻冕四章衣裳各二章衣重藻與粉米裳重黼黻

俱八等皆以藻爲領標繡冕三章衣一章裳二章衣重粉米裳重黼黻爲八等 公卿之服自祀冕而下

七又無毳冕藻冕四章衣裳各二章衣重粉米裳重黼黻爲七等皆以粉米爲領標各七繡冕三章衣一章裳二章衣重粉米裳重黼黻爲七等 上大夫之服自祀冕而下六又無藻冕繡冕三章衣一章裳二章衣重粉米裳重黼黻爲六等 中大夫之服自祀冕而下五又無皮弁繡冕三章衣一章裳二章衣重粉米爲五等 下大夫之服自祀冕而下四又無爵弁繡冕三章衣一章裳二章衣重粉米爲四等 韞

皇帝三章龍火山諸侯二章去龍卿大夫一章以山

皆織綵以成之 保定四年百官始執笏常服上焉
宇文護始命袍加下欄宣帝卽位受朝於路門初服
通天冠絳紗袍羣臣皆服漢魏衣冠大象元年制冕
二十四旒衣服以二十四章爲準二年下詔天臺近
侍及宿衛之官皆著五色衣以錦綺續繡爲緣名曰
品色衣有大禮則服冕內外命服皆執笏其拜俛伏
方興宣帝旣傳位於太子自稱天元皇帝所居稱天
臺冕二十四旒車服旂鼓皆加於前王之數
以上北周木周禮設司服之官而有山冕方
冕火冕之名則非古六冕制也

隋志高祖初卽位改周制采用東齊之法乘輿袞冕
垂白珠十有二旒以組爲纓色如其綬黼纁充耳玉
笄元衣纁裳衣山龍華蟲火宗彝五章裳藻粉米黼

黻四章衣重宗彝裳重黼黻爲十二等衣襖領織成
升龍白紗內單黼領青襖褙革帶玉鈎鐔大帶素
帶朱裏紕其外上以朱下以綠就隨裳色龍火山三
章鹿盧玉具劍火珠鏢首白玉雙佩元組雙大綬六
采元黃赤白縹綠純元質長二丈四尺五百首廣一
尺小雙綬長二尺六寸色同大綬而首半之間施三
玉環朱鞮赤舄舄加金飾祀圓丘方澤感帝明堂五
郊雩禘封禪朝日夕月宗廟社稷藉田廟遣上將征
還飲至元服納后正月受朝及臨軒拜王公則服之
皇太子袞冕垂白珠九旒青纁充耳犀笄元衣纁
裳衣山龍華蟲火宗彝五章裳藻粉米黼黻四章織

成爲之白紗內單黼領青襌襖裾革帶金鉤鐐大帶
素帶不朱裏亦紕以朱綠韍隨裳色火山二章玉具
劍火珠鏢首瑜玉雙佩朱組雙大綬四采赤白縹紺
純朱質長一丈八尺三百二十首廣九寸小雙綬長
二尺六寸色同大綬而首半之間施二玉環朱韠赤
舄以金飾侍從皇帝祭祀及謁廟元服納后則服之
袞冕青珠九旒以組爲纓色如其綬服九章同皇
太子王國公開國公初受冊執贄入朝祭親迎則服
之三公助祭者亦服之 鷩冕侯八旒伯七旒服七
章衣華蟲火宗彝三章裳藻粉米黼黻四章
八旒者重宗彝
侯伯初受冊執贄入朝祭親迎則服之 毳冕子六

旒男五旒服五章衣宗彝藻粉米三章裳黼黻二章

六旒者子男初受冊執贄入朝祭親迎則服之裳重黻 補

冕三品七旒四品六旒五品五旒服三章七旒者衣粉米一章

爲三重裳黼黻二章各二重六旒者減黼一重五旒又減黻一重 正三品已下從五

品已上助祭則服之 自王公已下服章皆繡爲之

祭服冕皆簪導青纁充耳元衣纁裳白紗內單黼領

補冕已下青標襪裾革帶鉤鑠大帶王三公及公侯伯子男素帶不

朱裏皆紕其外上以朱下以緣正三品已下從五品已上素帶紕其垂外以元內以黃組約皆用青組

朱韍凡韍皆隨裳色袞鷩毳火山二章補山一章 劍佩綬鞬赤舄 高祖

元正朝會方御通天服郊丘宗廟盡用龍袞衣大裘

毳補皆未能備至平陳得其衣冠法服始依禮具然

皆藏御府弗服用焉百官常服同於匹庶皆着黃袍
出入殿省高祖朝服亦如之唯帶加十三環以爲差
異蓋取於便事及大業元年煬帝始詔吏部尙書牛
宏工部尙書宇文愷兼內史侍郎虞世基給事郎許
善心儀曹郎袁朗等憲章古制創造衣冠 大裘冕
之制案周禮大裘之冕無旒三禮衣服圖大裘而冕
王祀吳天上帝及五帝之服至秦除六冕唯留元冕
漢明帝永平中方始創制董巴志云漢六冕同制皆
濶七寸長尺二寸前圓後方於是遂依此爲大裘冕
制青衣朱裏不施旒纁不通於下其大裘之服案周
官注羔裘也其制準禮圖以羔正黑者爲之取同色

緇以爲領袖其裳用纁而無章飾絳襪赤舄祀圓丘
感帝封禪五郊明堂雩禘皆服之 袞冕之制案禮
玉藻十有二旒大戴禮云冕而加旒以蔽明也琇纁
充耳以蔽聰也又禮舍文嘉前後遽延不視邪也加
以黹纁不聽讒也三王之冕旒旒旒旒旒旒旒旒旒旒
夏之時服周之冕今以采纁貫珠爲旒十二遽延者
出冕前後而下垂之旒齊於髀纁齊於耳組爲纁玉
笄導其爲服之制釋名云袞卷也謂畫龍於上也是
時虞世基奏曰後周故事升日月於旌旗乃闕三辰
而章無十二但有山龍華蟲作繪宗彝藻火粉米黼
黻乃與三公不異開皇中就裏欲生分別故衣重宗

彝裳重黼黻合重二物以就九章爲十二等但每一物上下重行袞服用九鷩服用七今重此三物乃非典故且周氏執謙不敢負於日月所以綴此三象唯施太常天王袞衣章乃從九但天子譬日德在照臨辰爲帝位月主正后負此三物合德齊明自古有之理應無惑周執謙道殊未可依重用宗彝又乖法服今準尙書予欲觀古人之服日月星辰山龍華蟲作會宗彝藻火粉米黼黻絺繡具依此於左右膊上爲日月各一當後領下而爲星辰又山龍九物各重行十二又近代故實依尙書大傳山龍純青華蟲純黃作會宗彝純黑藻純白火純赤以此相間而爲五采

鄭元議已自非之云五采相錯非一色也今並用織成於繡五色錯文準孔安國衣質以元加山龍華蟲火宗彝等並織成爲五物裳質以繡加藻粉米黼黻之四衣裳通數此爲九章兼上三辰而備十二也衣標領上各帖升龍漢晉以來率皆如此既是先王法服不可乖於夏制徵而用之理將爲允墨勅曰可承以單衣又案董巴輿服志宗廟冕服云絳領袖爲內單衣又車服雜記云天子釋奠郊祭而單衣以絳緣今用白紗爲內單黼領袖青裾及褻革帶玉鉤鑠大帶朱裏紕其外紕約用組上加朱黻又案說文韍韍也所以蔽前禮記曰有虞氏黻夏后氏山殷火周

龍章鄭注曰冕之韎也舜始作之以尊祭服禹湯至周增以文飾禮記曰君朱韠鄭曰韠象裳色今依白虎通注以蔽裳前上濶一尺象天數也下濶二尺象地數也長三尺象三才也加龍章山火以備三代之法也於是制袞冕之服元衣纁裳合九章爲十二等白紗內單黼領青襟襪革帶玉鉤鑾大帶韍鹿盧玉具劍火珠鏤首白玉雙佩元組大小綬朱韍赤舄舄飾以金宗廟社稷藉田方澤朝日夕月遣將授律征還飲至加元服納后正冬受朝臨軒拜爵皆服之驚冕案禮圖王祭先公及卿之服天子九旒用玉二百一十六侯伯服以助祭七旒用玉八十新制依此

服七章三品及公侯助祭則服之 毳冕案禮圖王
祀四望山川之服天子七旒用玉一百六十八子男
服以助祭五旒用玉五十新制依此服五章四品及
伯助祭則服之 黼冕案禮圖王者祭社稷五祀之
服天子五旒用玉一百二十孤卿服以助祭四旒用
玉三十二新制依此服三章五品及子男助祭則服
之 元冕案禮圖王祭羣小祀及視朝服天子四旒
用玉三十二諸侯服其祭其宗廟三旒用玉十八新
制依此服三章通給庶姓一品已下五品已上自製
於家祭其私廟三品省衣粉米加三重裳黼黻加二
重四品減黼一重五品減黻一重禮自元冕已上加

旒一等天子祭祀節級服之 開皇以來天子唯用
袞冕自鷩之下不施於尊具依前式而六等之冕皆
有黼黻黃繇爲之其大如橘 琕案禮天子摺琕方
正於天下也又五經異義天子笏曰琕琕直無所屈
也今制準此長尺二寸方而不折以球玉爲之 笏
按禮諸侯以象大夫魚須文竹士以竹本象可也凡
有指畫於君前受命書於笏笏畢用也五經要義云
所以記事防忽忘禮圖云度二尺有六寸中博二寸
其殺六分去一晉宋以來謂之手板此乃不經今還
謂之笏以法古名自西魏以降五品已上通用象牙
六品已下兼用竹木 履舄案圖云複下曰舄單下

曰履夏葛冬皮近代或以重皮而不加木失於乾腊之義口取乾腊之理以木重底冕服者色赤冕衣者色烏履同烏色諸非侍臣皆脫而升殿凡舄唯冕服及具服著之履則諸服皆用唯褶服以靴

以上隋

仿周禮六冕之制

唐志大裘冕者祀天地之服也廣八寸長一尺二寸以板爲之黑表纁裏無旒金飾玉簪導組帶爲纓色其綬黹纁充耳大裘緇表黑羔表爲緣纁裏黑領標襟緣朱裳白紗中單皐領青標襪裾朱襪赤舄鹿盧玉具劍火珠鏤首白玉雙佩黑組大雙綬黑質黑黃赤白纁緣爲純以備天地四方之色廣一尺長二丈

四尺五百首紛廣二寸四分長六尺四寸色如綬又
有小雙綬長二尺六寸色如大綬而首半之間施三
玉環革帶以白皮爲之以屬佩綬印章鞶囊亦曰鞶
帶博三寸半加金鏤玉鉤釐大帶以素爲之以朱爲
裏在腰及垂皆有裨上以朱錦貴正色也下以綠錦
賤間色也博四寸紐約貴賤皆用青組博三寸鞅以
緇爲之隨裳色上廣一尺以象天數下廣二尺以象
地數長三尺朱質畫龍火山三章以象三才其頸五
寸兩角有肩廣二寸以屬革帶朝服謂之鞞冕服謂
之敝 袞冕者踐祚饗廟征還遣將飲至加元服納
后元日受朝賀臨軒冊拜王公之服也廣一尺二寸

長二尺四寸飾玉簪導垂白珠十二旒朱絲組帶爲纓色如綬深青衣纁裳十二章日月星辰山龍華蟲火宗彝八章在衣藻粉米黼黻四章在裳衣畫裳纁以象天地之色也自山龍以下每章一行爲等每行十二衣襟領畫以升龍白紗中單黻領青襟襜褕黻纁龍火山三章舄加金飾 鷩冕者有事遠主之服也八旒七章華蟲火宗彝三章在衣藻粉米黼黻四章在裳 毳冕者祭海嶽之服也七旒五章宗彝藻粉米在衣黼黻在裳 絺冕者祭社稷饗先農之服也六旒三章絺粉米在衣黼黻在裳 元冕者蜡祭百神朝日夕月之服也五旒裳刺黼一章自衮冕以

下其制一也簪導劍佩綬皆同 皇太子之服袞冕者從祀謁廟加元服納妃之服也白珠九旒紅絲組爲纓犀簪導青纁充耳黑衣纁裳凡九章龍山華蟲火宗彝在衣藻粉米黼黻在裳白紗中單黼領青襟襜褕裾革帶金鉤釧大帶瑜玉雙佩朱組雙大綬朱質赤白纁紺爲純長一丈八尺廣九寸三百二十首黻隨裳色有火山二章白韞赤舄朱履加金塗銀鈿飾鹿盧玉具劍如天子 羣臣之服袞冕者一品之服也九旒青璫爲珠貫三采玉以組爲纓色如其綬青纁充耳寶飾角簪導青衣纁裳九章龍山華蟲火宗彝在衣藻粉米黼黻在裳皆絳爲纁遍衣白紗中

單黼領青襍褌朱韠赤舄革帶鉤鑠大帶黻隨裳
色金寶玉飾劍鑠首山元玉佩綠綬綬綬綠質綠紫黃
赤爲純長一丈八尺廣九寸二百四十首郊祀太尉
攝事亦服之 鷩冕者二品之服也八旒青衣纁裳
七章華蟲火宗彝在衣藻粉米黼黻在裳銀裝劍佩
水蒼玉紫綬紫質紫黃赤爲純長一丈六尺廣八寸
一百八十首革帶之後有金鏤鞶囊金飾劍水蒼玉
佩朱韠赤舄 毳冕者三品之服也七旒寶飾角簪
導五章宗彝藻粉米在衣黼黻在裳鞶二章山火紫
綬如二品金銀鏤鞶囊金飾劍水蒼玉佩朱韠赤舄
絺冕者四品之服也六旒三章粉米在衣黼黻在

裳中單青領黻山一章銀鏤鞞囊自三品以下皆青
綬青質青白紅爲純長一丈四尺廣七寸 百四十
首金飾劍水蒼玉佩朱韞赤舄 元冕者五品之服
也以羅爲之五旒衣黻無章裳刺黻一章角簪導青
衣纁裳其服用紬大帶及裨外黑內黃黑綬州質赤
紕爲純長一丈二尺廣六寸一百二十首象笏上圓
下方六品以竹木上挫下方金飾劍水蒼玉佩朱韞
赤舄三品以下私祭皆服之 平冕者郊廟武舞郎
之服也黑衣絳裳革帶烏皮履 顯慶元年長孫無
忌等曰武德初撰衣服令天子祀天地服大裘冕按
周郊被袞以象天戴冕藻十有二旒與大裘異月令

孟冬天子始裘以禦寒若啟蟄祈穀冬至報天服裘可也季夏迎氣龍見而雩如之何可服故歷代唯服袞章漢明帝始采周官禮記制祀天地之服天子備十二章後魏周隋皆如之伏請郊祀天地服袞冕罷大裘又新禮皇帝祭社稷服絺冕四旒三章祭日月服元冕三旒衣無章按月令四品五品之服也三公亞獻皆服袞孤卿服毳鷩是天子同於大夫君少臣多非禮之中且天子十二爲節以法天烏有四旒三章之服若諸臣助祭冕與王同是貴賤無分也若降王一等則王服元冕羣臣服爵弁旣屈天子又貶公卿周禮此文久不用矣猶祭祀之有尸侑以君親而

拜臣子若族蠅氏之職不通行者蓋多漢魏承用袞冕今新禮親祭日月服五品之服請循歷代故事諸祭皆用袞冕制曰可 開元初將有事南郊中書令張說請遵古制用大裘乃命有司製二冕元宗以大裘樸略不可通寒暑廢而不服

會要儀鳳二年蘇知機上言請製大明冕十二章乘輿服之如日月星辰龍虎山火麟鳳元龜雲水等象鷩冕八章三公服之毳冕六章三品服之黼冕四章五品服之詔下有司議楊炯奉議遂廢知機之請

以上唐

宋志袞冕之制宋初因五代之舊

以上五代

宋志大裘之制神宗元豐四年詳定郊廟奉祀禮文所言周禮司裘掌爲大裘以供王祀天之服司服王祀昊天上帝則服大裘而冕祀五帝亦如之享先王則袞冕而禮記云郊祭之日王被袞以象天戴冕璪十有二旒則天數也王肅據家語以爲臨燔柴脫袞冕著大裘則是禮記被袞與周禮大裘郊祀並用二服事不相戾但服之有先後耳是以開寶通禮皇帝服袞冕出赴行宮祀日服袞冕至大次質明改服大裘而冕出次蓋袞冕盛服而文之備者故於郊之前期被之以至大次旣臨燔柴則脫袞冕服裘以明天

道至質故被裘以體之今儀注車駕赴青城服通天冠絳紗袍祀之日乃服韡袍至大次服袞冕臨祭非尙質之義乞並依開寶通禮詔詳定所參議又言臣等詳大裘之制本以尙質而後世反以尙文故冕之飾大爲不經而禮書所載上有垂旒加飾又異大裘不裼之說今參考諸說大裘冕無旒廣八寸長一尺六寸前圓後方前低一寸二分元表朱裏以緇爲之玉笄以朱組爲紘玉璫以元紃垂之爲裘以黑羔皮領袖以黑緇纁裳朱紱而無章飾佩白玉元組纓革帶博二寸玉鉤鑠以佩紱屬之素帶朱裏絳純其外上朱下綠白紗中單皂領青褾襪裾朱韡赤舄黑紃

總純乞下所屬製造其當著奉祠之服乞降梁陸瑋
議以黑緇爲裘及唐輿服志以黑羔皮爲緣詔重詳
定光祿寺丞集賢校理陸佃言臣詳冕服有六周官
弁師云掌王之五冕則大裘與袞同冕故禮記云郊
之日王被袞以象天又曰服之襲也充美也禮不盛
服不充故大裘不裼此明王服大裘以袞衣襲之也
先儒或謂周禮天地皆服大裘而大裘之冕無旒非
是蓋古者裘不徒服其上必皆有衣故曰緇衣羔裘
黃衣狐裘素衣麕裘如郊祀徒服大裘則是表裘以
見天地表裘不入公門而乃欲以見天地可乎且先
王之服冬裘夏葛以適寒暑未有能易之者也郊祀

天地有裘無袞則夏祀赤帝與至日祭地祇亦將被
裘乎然則王者冬祀昊天上帝中裘而表袞明矣至
於夏祀天神地祇則去裘服袞以順時序周官曰凡
四時之祭祀以宜服之明夏不必衣裘也或曰祭天
尙質故徒服大裘被袞則非尙質臣以爲尙質者明
有所尙而已不皆用質也今欲冬至禋祀昊天上帝
服裘被袞其餘祀天及祀地祇並請服袞去裘各以
其宜服之於是詳定所言裘不可徒服禮記曰大裘
不謁則襲可知所謂大裘之襲者袞也與袞同冕伏
請冬祀昊天與黑帝皆服大裘被以袞其餘非冬祀
天及夏至祭地則皆服袞六年尙書禮部言經有大

裘而無其制近世所爲惟梁隋唐爲可考請緣隋制以黑羔皮爲裘黑緇爲領袖及裏緣袂廣可運肘長可蔽膝按皇侃說祭服之下有袍繭袍繭之下有中衣朝服裼衣之下有裘裘之下有中衣然則今之視郊中單當在大裘之下其袂之廣狹衣之長短皆當如裘伏乞改製於是神宗始服大裘而加袞冕焉哲宗元祐元年禮部言元豐所造大裘雖用黑羔皮乃作短袍樣襲於袞衣之下仍與袞服同冕未合典禮下禮部太常寺共議上官均吳安詩常安民劉唐老襲原姚勔請依元豐新禮丁鶴請循祖宗故事王愈請倣唐制朱光庭周秩請以元衣襲裘獨禮部員外

邱何洵直在元豐中嘗預詳定以陸佃所議有可疑者八按周禮節服氏掌祭祀朝覲袞冕六人惟王之太常郊祀袞冕二人既云袞冕又云袞冕是袞與袞各有冕乃云袞與袞同冕當以袞襲之袞既無冕又襲於袞中袞而表袞何以示袞袞之別哉古人雖質不應以袞爲夏服蓋冬用大裘當暑則以同色緇爲之記曰郊祭之日王被袞以象天若謂袞上被袞以被爲襲則家語亦有被袞象天之文諸儒或言臨燔柴脫袞冕著大裘或云脫袞服袞蓋袞袞無同冕兼服之理今乃以二服合爲一可乎且大裘天子吉服之最上若大圭大路之比是袞之在表者記曰大裘

不褻說者曰無別衣以褻之蓋他服之褻褻故表褻不入公門事天以報本復始故露質見素不爲表褻而冕亦無旒何必假他衣以藩飾之乎凡裘上有衣謂之褻褻上有衣謂之襲襲者裘上重二衣也大裘本不褻鄭志乃云裘上有元衣與裘同色蓋趙商之徒附會爲說不與經合襲之爲義本出於重沓非一衣也古者齋祭異冠齋服降祭服一等祀昊天上帝五帝以裘冕祭則衮冕齋故鄭氏云王齋服衮冕是衮冕者祀天之齋服也唐開元及開寶禮始以衮冕爲齋服裘冕爲祭服兼與張融臨燔柴脫衮服裘之義合請從唐制兼改製大裘以黑緇爲之仰復破其

說曰夫大裘而冕謂之裘冕非大裘而冕謂之衮冕則裘冕必服衮衮冕不必服裘今特言裘冕者主冬至言之周禮司裘掌爲大裘以供王祀天之服則祀地不服大裘以夏日至不可服裘故也今謂大裘以同色緇爲之尤不經見兼襦襲一衣而已初無重沓之義被裘而覆之則曰襲袒而露裘之美則曰襦所謂大裘不襦則非衮而何玉藻曰禮不盛服不充故大裘不襦則明不襦而襲也充美也鄭氏謂大裘之上元衣雖不知覆裘以衮然尙知大裘不可徒服必有元衣以覆之玉藻有尸襲之義周禮裘冕注云裘冕者從尸服也夫尸服大裘而襲則王服大裘而

襲可知且裘不可以徒服故被以袞豈借袞以爲飾哉今謂祭天用袞冕爲齋服裘冕爲祭服此乃襲先儒之謬誤後漢顯宗初服日月星辰十二章以祀天地自魏以來皆用袞服則漢魏祭天嘗服袞矣雖無大裘未能盡合於禮固未嘗有表裘而祭者也且裘內服也與袍同袍褻矣而欲禪以祭天以明示質是欲袞衣以見上帝也洵直復欲爲大裘之裘纁色而無章飾夫裘安得有裳哉請從先帝所志其後詔如洵直議去黑羔皮而以黑緇製焉政和議禮局上大裘青表纁裏黑羔皮爲領襟襖朱裳被以袞服冬至祀昊天上帝服之立冬祀黑帝立冬後祭神州地祇

亦如之中興之後無有存者紹興十三年禮部侍郎王賞等言郊祀大禮合依禮經皇帝服大裘被衮行禮據元豐詳定郊廟禮文何洵直議以黑緇創作大裘如衮惟領袖用黑羔乞如洵直議詔有司如祖宗舊制以羔製之禮部又言關西羊羔係天生黑色今有司涅白羔爲之不中禮制不如權以緇代又元祐中有司欲爲大裘度用百羔哲宗以爲害物遂用黑緇請依太常所言從之遂以衮襲裘冕亦十二旒焉衮冕之制宋初因五代之舊天子之服有衮冕冕廣一尺二寸長二尺四寸前後十二旒二纁並貫眞珠又有翠旒十二碧鳳銜之在珠旒外冕版以龍鱗

錦表上綴玉爲七星旁施琥珀餅犀餅各二十四周
綴金絲網鈿以眞珠雜寶玉加紫雲白鶴錦裏四柱
飾以七寶紅綾裏金飾玉簪導紅絲條組帶亦謂之
平天冠袞服青色日月星山龍雉虎雉七章紅裙藻
火粉米黼黻五章紅蔽膝升龍二並織成閒以雲朶
飾以金釵花鈿窠袞以眞珠琥珀雜寶玉紅羅襦裙
繡五章青襍襪裙六綵綬一小綬三結玉環三素大
帶朱裏青羅四神帶二繡四神盤結白羅中單青羅
抹帶紅羅勒帛鹿盧玉具劍玉鏢首鑲白玉雙佩金
飾貫眞珠金龍鳳革帶紅韞赤舄金釵花四神玉鼻
祭天地宗廟朝太清宮饗玉清昭應宮景靈宮受冊

尊號元日受朝冊皇太子則服之太祖建隆元年大
常禮院言準少府監牒請具袞龍衣絳紗袍通天冠
制度令式袞冕垂白珠十有二旒以組爲纓色如其
綬黼纁充耳玉簪導元衣纁裳十二章八章在衣日
月星辰山龍華蟲火宗彝四章在裳藻粉米黼黻衣
襖領如上爲升龍皆織就爲之小龍以下每章一行
重以爲等每行十二白紗中單黼領青襖襖裙蔽膝
加龍山火三章革帶玉鈎膝大帶素帶朱裏紕其外
上朱下綠紐約用組鹿盧玉具鈎大珠鐶首白玉雙
佩元組雙大綬六采元黃赤白纁綠純元質長二丈
四尺五寸首廣一尺小雙綬長二尺六寸色同大綬

而首半之間施三玉環朱纁赤舄加金飾詔可二年
太子詹事尹拙工部尙書竇儀議謹按周禮弁師掌
王之五冕朱裏纁紐五采纁十有二就皆五采玉十
有二玉笄朱紘諸侯之纁旒九就珉玉三采其餘如
王之事纁旒皆就玉璫玉笄疏云王不言玉璫於此
言之者王與諸侯互相見爲義是以王言元冕朱裏
延紐及朱紘明諸侯亦有之諸公言玉璫明王亦有
之詳此經疏之文則是本有充耳今請令君臣袞冕
以下並畫充耳以合正文從之乾德元年閏十二月
少府監楊格少監王處訥等上新造皇帝冠冕先是
郊祀冠冕多飾以珠玉帝以華而且重故命改製之

仁宗景祐二年又以帝后及羣臣冠服多沿唐舊而
用之久則有司寢爲繁文以失制度詔入內侍省御
藥院與太常禮院詳典故造冠冕蠲減珍華務從簡
約由是改製袞冕天版元闕一尺二寸長二尺四寸
今製廣八寸長一尺六寸減翠旒並鳳子前後二十
四珠旒並合典制天版頂上元織成龍鱗錦爲表紫
雲白鶴錦爲裏今製青羅爲表采畫出龍鱗紅羅爲
裏采畫出紫雲白鶴所有犀餅琥珀餅各二十四今
減不用金絲結網子上舊有金絲結龍八今減四亦
減絲令細天板四面花墜子素墜子依舊減輕造冠
身并天柱元織成龍鱗錦今用青羅采畫出龍鱗金

輪等七寶元眞玉碾成今更不用如補空却以雲龍
細窠分梳玉鈎二今減去之天河帶組帶疑慢帶依
舊減輕造納言元用玉製今用青羅采畫出龍鱗錦
金稜上稜道依舊用金卽減輕製黠纈玉簪宸服八
章日月星辰山龍華蟲火宗彝青羅身紅羅襖繡造
所有雲子相度稀稠補空更不用細窠亦不使眞珠
裝綴中單依舊皁白製造裙用紅羅繡出藻粉米繡
猷周迴花樣仍舊減稀製之蔽膝用紅羅繡升龍二
雲子補空減稀製之周迴依舊細窠不用六采綬依
舊減絲織造所有玉環亦減輕帶頭金葉減去用銷
金四神帶不用劍佩梁帶韞舄並依舊嘉祐元年王

洙奏天子法服冕旒形度重大華飾稍繁願集禮官
參定禮院繪圖以進因勅御藥院更造其後冕服稍
增侈如故英宗治平二年知太常禮院李育奏曰郊
廟之祭本尚純質袞冕之飾皆存法象非事繁侈重
其玩也冕則以周官爲本凡十二旒閒以采玉加以
紘紼并璫之飾袞則以虞書爲始凡十二章各以辰
象別以衣裳繪繡之采東漢至唐史官名儒記述前
制皆無珠翠犀寶之飾何則鵠羽蚌胎非法服所用
琥珀犀餅非至尊所冠龍錦七星已列采章之內紫
雲白鶴近出道家之語豈被袞戴璫象天則數之義
哉自大裘之廢頗用袞冕古朴稍去而法度尙存夫

明水大羹不可以眾味和雲門咸池不可以新聲聞
袞冕之服不宜以珍怪累也若魏明之用珊瑚江右
之用翡翠侈靡衰播之餘豈足爲聖朝道哉且太祖
建隆元年少府監所造冕服及二年博士聶崇義所
進三禮圖嘗詔尹拙竇儀參校之皆倣虞周漢唐之
舊至四年冬服之合祭天地於圜丘用此制也太宗
亦嘗命少府製於禁中不聞改作及眞宗封太山禮
官請服袞冕帝曰前王服羔裘尙質也今則無羔裘
而有袞冕可從近制是豈有意於繁飾哉蓋後之有
司率意妄增未嘗確議遂相循而用故仁宗嘗詔禮
官章得象等詳議之其所減過半然不經之飾重者

多去輕者尙存不能盡如詔書之意故至和三年王
洙復議去繁節禮官畫圖以獻漸還古禮而有司所
造復如景祐之前又按開寶通禮及衣服令冕服皆
有定法悉無寶錦之飾夫太祖太宗富有四海豈泛
寶玩顧不可施之郊廟也臣竊謂陛下肇祀天地躬
饗祖禰服周之冕觀古之象願復先王之制祖宗之
法其袞冕之服及鞶綬佩舄之類與通禮衣服令三
禮圖制度不同者宜悉改正詔太常禮院少府參定
遂合奏曰古者冕服之用郊廟殊制唐典天子之服
有二等而大裘尙存顯慶初長孫無忌等采郊特牲
之說獻議廢大裘自是郊廟之祭一用袞冕然旒章

之數止以十二爲節亦未聞有餘飾也國朝冕服雖倣古制然增以珍異巧縟前世所未嘗有夫國之大事莫大於祀而祭服違經非以肅祀容尊神明也臣等以謂宜如育言參酌通禮衣服令三禮圖及景祐三年減定之制一切改造之孔子曰麻冕禮也今也純儉吾從眾純者絲也變麻用絲蓋已久矣則冕服之制宜依舊以羅爲之冕廣一尺二寸長二尺二寸約以景表尺前圓後方黝上朱下以金飾板則以白玉珠爲旒貫之以五采絲繩前後各十二旒旒各十二珠相去一寸長二尺朱絲組爲綬黹繡充耳金飾玉簪導青衣纁裳十二章八章繪之於衣日月星辰

山龍華蟲火宗彝也四章繡之於裳藻粉米黼黻也
錦龍襖領織爲升龍山龍而下一章爲一行重以爲
等行十一別製大帶素表朱裏朱緣終辟鞞紱舄大
小綬亦云珠玉鈿窠琥珀玻璃之飾其中單革帶玉
具劍玉佩朱鞶之制已中禮令無復改爲則法服有
稽祭禮增重復詔禮院再詳以聞而內侍省奏謂景
祐中已裁定可因而用也從之神宗元豐元年詳定
郊廟禮文所言凡冕版廣八寸長尺六寸與古制相
合更不復議今取少府監造樣如以青羅爲表紅羅
爲裏則非弁師所謂元冕朱裏者也上用金稜天板
四周金絲結網兩旁用眞珠花素墜之類皆不應禮

伏請改用朱組爲統玉笄玉瑱以元統垂瑱以五采
玉貫於五色藻爲旒以青赤黃白黑五色備爲一玉
每一玉長一寸前後二十四旒垂而齊肩以合孔子
所謂純儉之義又古者祭服朝服之裳皆前三幅後
四幅前爲陽以象奇後爲陰以象偶惟深衣中單之
屬連衣裳而裳復不殊前後然以六幅交解爲十二
幅象十二月其制作莫不有法故謂之法服今少府
監袞服其裳乃以八幅爲之不殊前後有違古義伏
請改正祭服之裳以七幅爲之殊其前後以今太常
周尺度之幅廣二尺二寸每幅兩旁各縫殺一寸謂
之削幅腰間辟積無數裳側有純謂之緋裳下有純

謂之緡紳緡之廣各寸半表裏合爲三寸羣臣祭服之裳倣此從之政和議禮局更上皇帝冕服之制冕版廣八寸長一尺六寸前高八寸五分後高九寸五分青表朱裏前後各十有二旒五采藻十有二就就間相去一寸青碧錦織成天河帶長一丈二尺廣二寸朱絲組帶爲纓黹纁充耳金飾玉簪導長一尺二寸袞服青衣八章繪日月星辰山龍華蟲火宗彝繡裳四章繡藻粉米黼黻蔽膝隨裳色繡升龍二白羅中單皐襮襖紅羅勒帛青羅袜帶緋白羅大帶革帶白玉雙佩大纓六采赤黃黑白縹綠小纓三色如大纓間施玉環三朱韞赤舄緣以黃羅中興仍舊制延

以羅衣木元表朱裏長尺有六寸前低一寸一分四
角緣以金覆於卷武之上纁以五色絲貫五色玉前
後各十二凡用二百八十有八玉笄充耳用黃綿紘
以朱組以其一屬於左笄上垂下又屈而屬於右笄
繫之而垂其餘衣元八章升龍於山繪裳纁四章纁
幅前三後四斷而不屬兩旁殺縫腰辟積裊緗之廣
皆如舊大帶以緋白羅合而紩之以朱綠飾其側上
朱下綠其束處以組爲紩約下垂三尺白羅中單領
襖襖以黻服裝則以皐綬大小各一大綬織以六采
青黃黑白纁綠下垂青絲綯上有結垂玉環三小綬
制如大綬革帶博二寸革爲裏緋羅爲表飾以玉鈎

鈕以玉鉤鐮釳從裳色上有紕下有純去上五寸繪以山龍火上接革帶繫之佩有衡有琕琕有衝牙繫於革帶左右各一上設衡衡下垂三帶貫以纓珠次則中有金獸面兩旁夾以雙璜又次設琕琕下則衝牙居中央兩旁有玉滴子行則擊牙而有聲舄有紕有純有纁有綦以緋羅爲之首加金飾韞羅表繒裏施鞞著綦以繫之赤舄以朱朱初凡大祭祀大朝會天子皆執圭元豐三年詔議大圭尺度詳定所言考工記鎮圭尺有二寸天子守之大圭長三寸杼上終葵首天子服之後魏以降以白玉爲之長尺有二寸西魏以來皆然方而不折雖非古制蓋後世以所得

之玉隨宜爲之今請揆玉之有無制之哲宗元祐元年禮部言元豐新禮皇帝祀天搢大圭其制圓首前詘於禮未合今欲倣西魏隋唐玉笏之制方而不折上下皆博三寸長尺二寸其厚以鎮圭爲約從之政和三年詔冬祀可搢大圭執元圭永爲定制中興仍舊制大祭祀則執大圭以爲笏 皇太子之服袞冕青羅表緋羅紅綾裏塗金銀鈹花飭犀簪導紅絲組前白珠九旒二纁貫水晶珠青羅衣繡山龍雉火虎雌五章紅羅裳繡藻粉米黼黻四章紅羅蔽膝繡山火二章白紗中單青褙襖裾革帶塗金銀鉤槃瑜玉雙佩四采織成大綬結二玉環金塗銀鈹花飾青羅

抹帶紅羅勒帛玉具劍金塗銀鈹花玉鏤首白羅韞
朱履金塗銀釧從祀則服之至道元年太常禮院言
南郊皇太子充亞獻合著祭祀服準制度袞冕以組
爲纓色如其綬青纁充耳元衣纁裳凡九章每章一
行重以爲等皆織爲之白紗中單黻領青標襪裾革
帶金鉤釵大帶素帶不朱裏亦紕以朱綠紐約用組
黻隨裳色二章朱組雙大綬四采赤白襍襪純朱質
長一丈八尺三百二十首廣九寸小雙綬長二尺六
寸色同大綬而首半之間施二玉環朱韞赤舄舄加
金飾餘同舊制侍從祭祀及謁廟加元服納妃則服
之中興并同其皇子之服紹興三十二年十月禮官

言皇子鄧慶恭三王遇行事若祭服則金塗銀八
旒冕真玉佩綬緋羅履襪詔文思院製造 諸臣祭
服唐制有袞冕九旒鷩冕八旒毳冕七旒絺冕六旒
元冕五旒宋初省八旒六旒冕九旒冕塗金銀花額
犀玳瑁簪導青羅衣繡山龍雉火虎雌五章緋羅裳
繡藻粉米黼黻四章緋蔽膝繡山火二章白花羅中
單玉裝劍佩革帶暈錦綬二玉環緋白羅大帶緋羅
襪履親王中書門下奉祀則服之其冕無額花者元
衣纁裳悉畫小白綾中單師子錦綬二銀環餘同上
三公奉祀則服之七旒冕犀角簪導衣畫虎雌粉米
二章裳畫黼黻二章銀裝佩劍革帶餘同九旒冕九

卿奉祀則服之五旒冕青羅衣裳無章銅裝佩劍革帶餘同七旒冕四品五品爲獻官則服之六品以下無劍佩綬紫檀衣朱裳羅爲之皐大綬綬銅裝劍佩御史博士服之平冕無旒青衣纁裳無劍佩綬餘同五旒冕太祝奉禮服之慶厯三年太常博士余靖言周禮司服之職掌王之吉服大裘而冕無旒以祀昊天上帝祀五帝亦如之袞冕十有二旒其服十有二章以享先王鷩冕八旒其服七章以享先公亦以饗射毳冕七旒其服五章以祀四望山川絺冕六旒其服三章以祭社稷五祀元冕五旒其服無章以祭小祀此皆天子親行祠事所服冕服悉因所祀大小神

鬼以爲制度今大祠中祠所遣獻官並用上公九旒
九章冕服以爲初獻其餘公卿亦皆七旒冕服全無
等降小祠則公服行事乖戾舊典宜詳周禮因所祭
鬼神以爲獻官冕服之制詔下禮官議奏曰聖朝之
制唯皇帝親祠郊廟及朝會大禮服袞冕外餘冕皆
不設其每歲常祀遣官行事攝公則服一品九旒冕
攝卿則服三品七旒冕自從品制爲服不以祠之大
小爲差至於小祠獻官舊以公服行事則有違典禮
案衣服令五旒冕衣裳無章阜綬綬銅裝劍佩四品
以下爲獻官則服之今小祠獻官旣不攝公卿則盡
屬四品以下當有祭服請除公卿祭服仍舊從本品

外小祠所遣獻官並依令文祭服行事若非時告祭用香幣禮器行事之處亦皆準此詔施行焉皇祐四年同知太常禮院邵必言伏見監察使監禮各冠五旒冕衣裳無章色以紫檀案周禮六冕之制凡有旒者衣裳皆有章惟大裘冕無旒衣裳無章一命大夫之冕無旒衣裳亦無章今監祭監禮所服冕五旒侯伯之冕也而衣無章深所不稱色以紫檀又無經據竊詳監祭監禮既非祠官則御史博士爾而服用五等蓋非所宜而且有旒無章況國家南郊大禮太常卿止服朝服前導皇帝明非祠官也今後監祭者請冠獬豸監禮者冠進賢爲稱詔不允元豐元年詳定

禮文所言國家服章視唐尤爲不備於令文祀儀有
九旒冕七旒冕五旒冕今旣無冕名而有司仍不制
七旒冕乃有四旒冕其非禮尤甚又服之者不以官
秩上下故分獻四品官者服四旒冕博士御史則冕
五旒而衣紫檀太祝奉禮則服平冕而無佩玉此因
循不謹之失也且古者朝祭異服所以別事神與事
君之禮今皇帝冬至及正旦御殿服通天冠絳紗袍
則百官皆服朝服乃禮之稱至親祠郊廟皇帝嚴裘
冕以事神而侍祠之官止以朝服豈禮之稱哉至於
景靈宮分獻官皆服朝服尤爲失禮伏請親祠郊廟
景靈宮除導駕贊引扶持宿衛之官其侍祠及分獻

者並服祭服如所考制度脩製五冕及爵弁服各正
冕弁之名又國朝祀儀祭社稷朝日夕月風師雨師
皆服袞冕其蜡祭先蠶五龍亦如之祭司命戶竈門
厲行皆服鷩冕壽星靈星司中司寒中霤馬祭皆服
毳冕皆非是今天子六服自鷩冕而下既不親祠廢
而不用則諸臣攝事自當從王所祭之服伏請依周
禮凡祀四望山川則以毳冕祭社稷五祀則以絺冕
朝日夕月風師雨師司命司中則以元冕若七祀蜡
祭百神先蠶五龍靈星壽星司寒馬祭蓋皆羣小祀
之比當服元冕從之哲宗元祐元年太常寺言舊制
大禮行事執事官並服祭服餘服朝服至元豐七年

呂升卿始有行事及陪祠官並服祭服之議今欲令
行事執事官並服祭服其贊引行事禮儀使太常卿
太常博士閣門使樞密院官進接主殿中監止供奉
皇帝其陪位官止導駕押宿及主管事務并他處行
事官仍服朝服從之徽宗大觀元年議禮局言太社
太學獻官祝禮皆以法服奉祠至郡邑則用常服乞
降祭服詔頒制度於州郡然未明使製造後政和間
始詔州縣冠服形制詭異今禮制局造樣頒下轉運
司轉運司製以給州縣焉二年議禮局檢討官俞朶
言元以象道纁以象事故凡冕皆元衣纁裳今太常
寺祭服則衣色青矣前三幅以象陽後四幅以象陰

故裳制不相連屬今之裳則爲六幅乃不殊矣冕元表而朱裏今乃青羅爲覆以金銀飾之佩用綬以貫玉今既有玉佩矣又有錦綬以銀銅一環飾之以玉宗彝宗廟之彝也乃爲虎雌之狀而不作虎彝雌彝粉米散利以養人也乃分爲二章而以五色圓花爲藉其餘不合古者甚多乞下禮局博考古制書太常寺及古者祭服樣二本以進至於損益裁成斷自聖學詔令議禮局詳議四年議禮局官宇文粹中議改衣服制度曰凡冕皆元衣纁裳衣則繪而章數皆奇裳則繡而章數皆偶陰陽之義也今衣用深青非是欲乞視冕之等衣色用元裳色用纁以應典禮古者

蔽前而已芾存此象以韋爲之今蔽膝自一品以下
並以緋羅爲表緣緋絹爲裏無復上下廣狹及會紕
純紉之制又有山火龍章黻者乃黻冕之黻非赤芾之芾
后氏山商火周龍章黻者乃黻冕之黻非赤芾之芾
也且芾在下體與裳同用而山龍火者衣之章也周
旣續於上衣不應又續於芾請改芾制去山龍火章
以破諸儒之惑又祭服有革帶今不用皮革而通裏
以緋羅又以銅爲飾其綬或錦或皐環或銀或銅尤
無經據宜依古制除去至佩玉中單赤舄之制則全
取元豐中詳定官所議行之粹中又上所編祭服制
度曰古者冕以木版爲中廣八寸長尺六寸後方前

圓後仰前低染三十升之布元表朱裏後方者不變之體前圓者無方之用仰而元者升而辨於物俯而朱者降而與萬物相見後世以縉易布故純儉今羣臣冕版長一尺二寸闊六寸二分非古廣尺之制以青羅爲覆以金塗銀稜爲飾非古元表朱裏之制乞下有司改正古者冕之名雖有五而纁就旒玉則視其命數以爲等差合綵絲爲繩用以貫玉謂之纁以一玉爲一成結之使不相并謂之就就間相去一寸則九玉者九寸七玉者七寸各以旒數長短爲差今羣臣之冕用藥玉青珠五色茸線非藻玉三采二采之義每旒之長各八寸非旒數長短爲差之義又獻

官冕服雜以諸侯之制而一品服袞冕臣竊以爲非
宜元豐中禮官建言請資政殿大學士以上侍祠服
鷩冕觀察使以上服毳冕監察御史以上服絺冕朝
官以上服元冕選人以上爵弁詔許之而不用爵弁
供奉官以下至選人盡服元冕無旒臣竊謂依此參
定乃合禮制古者三公一命袞則三公在朝其服當
鷩冕蓋出封則遠君而伸在朝則近君而屈今之攝
事及侍祠皆在朝之臣也在朝之臣乃與古之出封
者同命數非先王之意乞下有司制鷩冕八旒毳冕
六旒絺冕四旒元冕三旒其次二旒又其次無旒依
元豐詔旨參酌等降爲侍祠及攝祭之服長短之度

采色之別皆乞依古制施行又案周禮諸侯爵有五等而服則三所謂公之服自衮冕而下侯伯自鷩冕而下子男自毳冕而下是也古者諸侯有君之道故其服以五七九爲節今之郡守雖曰猶古之侯伯其實皆王臣也欲乞只用羣臣之服自鷩冕而下分爲三等三都四輔爲一等初獻鷩冕八旒經略安撫鈐轄爲一等初獻毳冕六旒亞獻並元冕二旒終獻無旒節鎮防團軍事爲一等初獻絺冕四旒亞終獻並元冕無旒其衣服之制則各從其冕之等又曰今之絺組仍綴兩綰帶而結於頤冕旁仍垂青纁而不以瑱以犀爲簪而不以玉笄象笄并非古制乞下有司

改正從之政和議禮局言大觀中所上羣臣祭服制度已依所奏脩定乞付有司依圖畫製造既又上羣臣祭服之制正一品九旒冕金塗銀稜有額花犀簪青衣畫絳龍朱裳蔽膝白羅中單大帶革帶玉佩錦綬青絲網玉環朱韞屨革帶以金塗銀玉佩以金塗銀裝綬以天下樂暈親祠大禮使亞獻終獻太宰少宰左丞每歲大祠宰臣親王執政官郡王充初獻服之奏告官並依本品服已下準此從一品九旒冕無額花白綾中單紅錦綬銀環金塗銀佩餘如正一品服親祠吏部戶部禮部兵部工部尙書大廟進受幣爵奉幣爵宗室每歲大祠捧俎官大祠中祠初獻官

服之二品七旒冕角簪青衣無降龍餘如從一品服
親祠禮部侍中殿中監大司樂光祿卿讀冊官太廟
薦俎贊進飲福宗室七祀配享功臣分獻官每歲大
祀謂用宮駕者大司樂大祠中祠亞終獻大祠禮官
小司獻官朔祭太常卿服之三品五旒冕皐綾綬銅
環金塗銅革帶佩餘如二品服親祠舉冊官大樂令
光祿丞奉俎饌籩豆簠簋官分獻官分獻壇壝從祀
太廟奉瓊盤薦香燈安奉神主奉毛血槃蕭蒿篚肝
膋豆宗室每歲祭祠大樂令大中祠分獻官服之無
旒冕素青衣朱裳蔽膝無佩綬餘如三品服奉禮協
律郎郊社令太祝太官令親祠擗鼎官進搏黍官太

廟供亞終獻金鉉供七祀獻官木爵官服之五旒冕
紫檀繩衣餘如三品服監察御史服之州郡祭服三
都初獻八旒冕經略安撫鈐轄初獻六旒冕亞獻並
二旒冕終獻無旒節鎮防團軍事初獻四旒冕亞終
獻並無旒冕中興之後省九旒七旒五旒冕定爲四
等一曰鷩冕八旒二曰毳冕六旒三曰絺冕四旒四
曰元冕無旒其義以公卿大夫士皆北面爲臣又近
尊者而屈故其節以八以六以四從陰數也先是紹
興四年五月國子監丞王普奏言臣嘗考諸經傳具
得冕服之制蓋王之三公八命鷩冕八旒衣裳七章
其章各八孤卿六命毳冕六旒衣裳五章其章各六

大夫四命絺冕四旒衣裳三章其章各四上士三命元冕三旒中士再命元冕二旒下士一命元冕無旒衣皆無章裳韍視其命數自三而下其縹至筭衡紘統瑱纁帶佩芾舄中衣皆有等差近世冕服制度沿襲失真多不如古夫後方而前圓後昂而前俛元表而朱裏此冕之制也今則方圓俛仰幾於無辨且以青爲表而飾以金銀矣其衣皆元其裳皆纁裳前三而後四幅此衣裳之制也今則衣色以青裳色以緋且以六幅而不殊矣山以章也今則以墮火以圓也今則以銳宗彝宗廟虎雉之彝也乃畫虎雉之狀而不爲虎雉彝粉米米而粉之者也乃分爲二章而以

五色圓花爲藉佩有衡璜琚瑀衡牙而已乃加以雙
商而重設二衡綬以貫佩玉而已乃別爲錦綬而間
以雙環以至帶無紐約帶無肩頸舄無絢纁中衣無
連裳臣伏讀國朝會要郊廟奉祀禮文祖宗以來屢
嘗講究第以舊服無有存者欲乞因茲改作是正訛
謬一從周制以合先聖之言尋禮部契勘奏言衣服
之制或因時王而爲之損益事雖變古要皆一時制
作不無因革或考之先王而有繆戾者雖行之已久
不應承誤襲非憚於改正案周官自上公服袞王之
三公服鷩以至士服元冕凡五等唐制自一品服袞
冕九旒至五品服元冕無旒亦五等國家承唐之舊

初有五旒之名其後去三公袞冕及絺冕但存七旒
鷩冕五旒毳冕與無旒元冕凡三等而已袞服非三
公所服去之可也乃併絺冕去之自尙書服毳冕以
至光祿丞亦服焉貴賤幾無差等此皆一時制作不
無因革今合增鷩冕爲八旒增毳冕爲六旒復置絺
冕爲四旒并及無旒元冕共四等庶幾稍合周制君
冕之方圓低昂至於無辨則制造之差也以青爲表
非不用元也爲元而不至者也以緋爲裳非不用纁
也爲纁而太過者也山止而靜者也今象其峭是得
山之勢而不知其性火圓而神者也今象其銳是得
火之形而不得其神也至於宗彝粉米佩綬帶紐帶

屨之屬皆宜改正施行是時諸臣奏請討論雖詳然終以承襲之久未能盡革也鷩冕八旒每旒八玉三采朱白蒼角弁青纁以三色紃垂之紃以紫羅屬於武衣以青黑羅三章華蟲火虎雉彝裳以纁表羅裏緇七幅繡四章藻粉黼黻大帶中單佩以珉貫以藥珠綬以絳錦銀環黻上紃下純繪二章山火革帶緋羅表金塗銀裝譏舄並如舊制宰相亞終獻大禮使服之前期景靈宮太廟亞終獻明堂滌濯進玉爵酒官亦如之毳冕六玉三采衣三章繪虎雉彝藻粉朱裳二章繡黼黻佩藥珠衡璜等以金塗銅帶黻繪以山革帶以金塗銅餘如鷩冕六部侍郎以上服之前

期景靈宮太廟進爵酒幣官奉幣官受爵酒幣官薦
俎官明堂受玉爵受玉幣奉徹籩豆進飲福酒徹俎
祝腥贊引亞終獻禮儀使亞終獻爵并盥洗官四員
並如之前二日奏告初獻社壇九宮壇分祭初獻亞
獻亦如之絺冕四玉二采朱綠衣一章繪粉米裳二
章繡黼黻綬以皁綾銅環餘如毳冕光祿卿監察御
史讀冊官舉冊官分獻官以上服之前期景靈宮太
廟奏奉神主官明堂太府卿光祿卿沃水舉冊官讀
冊官押樂太常卿東朶殿三員西朶殿三員東廊二
十八員西廊二十五員南廊二十七員戟門祭獻官
前二日奏告亞獻終獻官監察御史並如之社稷九

宮壇分祭終獻官監察御史兵工部光祿卿丞亦如之元冕無旒無佩綬衣純黑無章裳刺黼而已敔無刺繡餘如絺冕光祿丞奉禮郎協律郎進搏黍官太社令良醢令太官令奉俎饌等官供祠執事官內侍以下服之明堂光祿丞奉禮郎良醢令太祝搏黍官官架協律郎登歌協律郎奉御官內侍供祀執事官武臣奉俎官執門祭奉禮郎太祝令太官令社壇九宮壇分祭太社太祝太官令奉禮郎並如之紫壇冕四旒服紫檀衣博士御史服之外州軍祭服鷩冕八旒三都初獻服之毳冕六旒經略安撫鈐轄初獻服之絺冕四旒經略安撫鈐轄亞獻服之節鎮防團軍

事初獻亦如之元冕無旒節鎮防團軍事亞終獻服之笏唐制五品以上用象上圓下方六品以下用竹木上挫下方宋文散五品以上用象九品以上用木武臣內職並用象千牛衣緣亦用象廷賜緋綠者給之中興同

以上宋

遠志祭服終遠之世郊丘不建大裘冕服不書 衮冕祭祀宗廟遣上將出征飲至踐阼加元服納后若元日受朝則服之金飾垂白珠十二旒以組爲纓色如其綬黼纁充耳玉簪導元衣纁裳十二章八章在衣日月星龍華蟲火山宗彝四章在裳藻粉米黼黻

衣標領爲升龍織成文各爲六等龍山以下每章一行行十二白紗中單黼領青標襪裾黻革帶大帶劍佩綬舄加金飾元日朝會儀皇帝服袞冕

以上遼

金志金制皇帝服通天絳紗袞冕偏舄卽前代之遺制也冕制天板長一尺六寸廣八寸前高八寸五分後高九寸五分身圍一尺八寸三分并納言并用青羅爲表紅羅爲裏週迴用金稜天板下有四柱四面珍珠網結于花素墜子前後珠旒共二十四旒各長一尺二寸青碧線織造天河帶一長一丈二尺闊二寸兩頭各有真珠金碧旒三節玉滴子節花紅線組

帶二上有眞珠金翠旒玉滴子節花下有金鐸子二
枚紅線欵幔帶一粧纈二眞珠垂繫上用金萼子二
簪窠欵幔組帶鈿窠各二內組帶鈿窠四並玉縷塵
碾造玉簪一頂方二寸導長一尺二寸簪頂刻鏤塵
雲龍 袞用青羅夾製五綵間金繪畫正面日一月
一昇龍四山十二上下襟華蟲火各六對虎雉各六
對背面星一昇龍四山十二華蟲火各十二對虎雉
各六對中單一白羅單製羅領襖襖裳一帶襖襖紅
羅八幅夾製繡藻三十一粉十六米十六黼三十二
黻三十二蔽膝一帶襖襖並紅羅夾製繡昇龍二綬
一幅大綬以赤黃黑白綠襖六綵織紅羅托裏小綬

三色同大綬銷金黃羅綬頭上間施三玉環皆刻雲龍大綬五百首小綬半之緋白大帶一銷金黃羅帶頭鈿釵二十四紅羅勒帛一青羅抹帶一玉佩二白玉上中下璜各一半月各二皆刻雲龍玉滴子各二皆以眞珠穿製金篋鈎獸面水華環釘涼帶一紅羅裏鑲金上有玉鵝七鈿尾束各一金拳龍口以玳瑁板襯釘脚舄重底紅羅面白綾托裏如意頭銷金黃羅緣口玉舄仁飾以珠譏用緋羅加綿凡大祭祀加尊號受冊寶則服袞冕行幸齋戒出宮或御正殿則通天冠絳紗袍 皇太子冠服冕用白珠九旒紅絲組爲纓青纁充耳犀簪導袞青衣朱裳五章在衣山

龍華蟲火宗彝四章在裳藻粉米黼黻白紗中單青
標襪裾革帶塗金銀鉤釵蔽膝隨裳色爲火山二章
瑜玉雙佩四采織成大綬間施玉環三白襪朱舄舄
加金塗銀鉅謁廟則服之 臣下祭服皇統七年太
常寺言太廟成後奉安神主祫享行禮凡行事執事
助祭陪位官唯古典當服袞冕九章畫降龍隨品各
有等差通典云虞夏殷並十二章日月星辰山龍華
蟲作繪於衣宗彝藻火粉米黼黻絺繡於裳周升三
辰於旂登龍於山登火於宗彝作九章之服山龍華
蟲火宗彝繪於衣藻粉米黼黻繡於裳公之服白袞
冕而下如王之服侯伯自鷩冕而下如公之服又後

魏帝服袞冕與祭者皆朝服又開元禮一品服九章又五禮新儀正一品服九旒冕犀簪青衣畫降龍今汴京舊禮直官言自宣和二年已後一品祭服七旒冕大袖無龍唐雖服九章服當時司禮少常伯孫茂道言諸臣之章雖殊然飾龍名袞尊卑相亂請三公服鷩冕八章爲宜臣等竊謂歷代衣服之制不同若從後魏則止服朝服或用宋服則爲七章若遵唐九章則有飾龍名袞尊卑相亂之議尙書省乃奏用後魏故事止用燕京大冊禮時所服朝服以祭大定三年八月詔遵皇統制攝官則朝服散官則公服以皇太子爲亞獻服袞冕十四年用唐制若祭遇雨雪則

服常服謂今之公服也泰和元年八月禮官言祭服所以接神朝服所以事君雖歷代損益不同然未嘗不有分別是以袞冕十二旒元衣纁裳備十二章天子之祭服也通天冠絳紗袍天子之視朝服也臣下之服則用青衣朱裳以祭朱衣朱裳以朝國朝惟天子備袞冕通天冠二等之服今羣臣但有朝服而祭服尙闕每有祀事但以朝服從事實於典禮未當請依漢唐故事祭服冕旒畫章然君冕服雖章數各殊而俱飾龍名袞而唐孫茂道已有尊卑相亂之論然三公法服有龍恐涉於僭國初禮官亦嘗駁議乞參酌古今改置祭服其冠則如朝冠而但去其貂蟬豎

筆其服用青衣朱裳白襪朱履非攝事者則用朝服
庶幾少有差別上曰朝祭之服固宜分也

以上金

元志天子冕服袞冕制以漆紗上覆曰縹青表朱裏
縹之四周匝以雲龍冠之口圍縹以珍珠縹之前後
旒各十二以珍珠爲之縹之左右繫紱縹二繫以元
紱承以玉瑱縹色黃絡以珠冠之周圍珠雲龍網結
通翠柳調珠縹上橫天河帶一左右至地球鉤窠網
結翠柳朱絲組二屬諸笄爲纓絡以翠柳調珠簪以
玉爲之橫貫於冠 袞龍服制以青羅飾以生色銷
金帝星一日一月一昇龍四複身龍四山三十八火

四十八華蟲四十八虎雌四十八 裳制以緋羅其
狀如裙飾以文繡凡一十二行每行藻二粉米一黼
二黻二 中單制以白紗絳緣黃勒帛副之 蔽膝
制以緋羅有標緋絹爲裏其形如襜褕上著之繡複
身龍 玉珮珩一琚一瑀一衝牙一璜二衝牙以繫
璜珩下有銀獸面塗以黃金雙璜夾之次又有衝下
有衝牙傍別施雙的以鳴用玉 大帶制以緋白二
色羅合縫爲之 玉環綬制以納石失金錦也上有三
小玉環下有青絲織網 紅羅韠制以紅羅爲之高
鞞 履制以納石失有雙耳二帶鉤飾以珠 韞制
以紅綾 右按太常集禮至元十二年十一月博士

議擬冕天版長一尺六寸廣八寸前高八寸五分後
高九寸五分身圍一尺八寸三分并納言用青羅爲
表紅羅爲裏周迴緣以黃金天板下四面珠網結子
花素墜子前後二十有四旒以珍珠爲之青碧線織
天河帶兩頭各有珍珠金翠旒三節玉滴子節花全
紅綿組帶二上有珍珠金翠旒玉滴子下有金鐸二
梅紅繡欵幔帶一跼纁二珍珠垂繫上用金萼子二
簪窠欵幔組帶鈿窠各二內組帶窠四並鏤玉爲之
玉簪一頂面鏤雲龍袞衣用青羅夾製五采間金繪
日月星辰山龍華蟲宗彝正面日一月一升龍四山
十二上下襟華蟲火各六對虎雌各口對背星一升

龍四山十二華蟲火各十二對虎雌各六對中單用
白羅單製羅領襟襖裳一帶襟襖全紅羅八幅夾造
上繡藻粉米黼黻藻三十三粉米十六黼三十二黻
三十二蔽膝一帶襟襖紅羅夾造八幅上繡升龍二
綬一幅六采織造紅羅托裏小綬三色同大綬銷金
黃羅綬頭全上間施二玉環並碾雲龍緋白大帶一
銷金黃帶頭鈿窠二十有四紅羅勒帛一青羅抹帶
一佩二玉上中下璜各一半月各二並碾玉爲雲龍
文玉滴子各二並珍珠穿造金篋鉤獸面水葉環釵
全涼帶一紅羅裏鏤金爲之上爲玉鶯七撻尾束各
一金攀龍口玳瑁襯釘烏一重底紅羅面白綾托裏

如意頭銷金黃羅緣口玉鼻人飾以珍珠金緋羅錦
襪一兩 皇太子冠服袞冕元衣纁裳中單蔽膝玉
佩大綬朱襪赤舄 按太常集禮至元十二年博士
擬袞冕制用白珠九旒紅絲組爲纓青纁充耳犀簪
導青衣朱裳九章五章在衣山龍華蟲火宗彝四章
在裳藻粉米黼黻白紗中單青標襪裙革帶塗金銀
鈎鑲蔽膝隨裳色爲火山二章瑜玉雙佩四采織成
大綬間施玉環三白襪朱舄舄加金塗銀釧大德十
一年九月照擬前代制度已擬其制未果造

以上元

明史輿服志皇帝冕服洪武元年學士陶安請製五

冕太祖曰此禮太繁祭天地宗廟服袞冕社稷等祀服通天冠絳紗袍餘不用三年更定正旦冬至聖節並服袞冕祭社稷先農冊拜亦如之十六年定袞冕之制冕前圓後方元表纁裏前後各十二旒旒五采玉十二珠五采纁十有二就就相去一寸紅絲組爲纓黼纁充耳玉簪導袞元衣黃裳十二章日月星辰山龍華蟲六章織於衣宗彝藻火粉米黼黻六章繡於裳白羅大帶紅裏蔽膝隨裳色繡龍火山文玉革帶玉佩大綬六采赤黃黑白纁綠小綬三色同大綬間施三玉環白羅中單黻領青綠襖黃襪黃金舄飾二十六年更定袞冕十二章冕版廣一尺二寸長二

尺四寸冠上有覆元表朱裏餘如舊制圭長一尺二寸袞元衣纁裳十二章如舊制中單以素紗爲之紅羅蔽膝上廣一尺下廣二尺長三尺織火龍山三章革帶佩玉長三尺三寸大帶素表朱裏兩邊用緣上以朱錦下以綠錦大綬六采黃白赤元標綠織成純元質五百首凡合單紉爲一系四系爲一扶五扶爲一首小綬三色同大綬間織三玉環朱襪赤舄永樂三年定冕冠以皂紗爲之上覆曰緹桐板爲質衣之以綺元表朱裏前圓後方以玉衡維冠玉簪貫紐組與冠武足前體下曰武綬並在冠之下亦曰武並繫纓處皆飾以金緹以左右垂黹續充耳川黃玉繫以元紃承以白玉瑱朱紃餘如舊制玉圭長一尺二寸

刺其上刻山四以象四鎮之山蓋周鎮圭之制異於
大圭不琢者也以黃綺約其下別以囊韜之金龍文
袞服上有二章元衣八章日月龍在肩星辰山在背
火華蟲宗彝在袖每袖各三皆織成本色領標襪裾標者襪者
衣緣纁裳四章織藻粉米黼黻各二前三幅後四幅
前後不相屬其腰有辟積本色綽綌裳側有純謂之綽
之綌純也中單以素紗爲之青領標襪裾領織黻文十
三蔽膝隨裳色四章織藻粉米黼黻各二本色緣有
紃施於縫中玉鈎二玉佩二各用玉珩一瑀一琚二
衝牙一璜二瑀下垂玉花一玉滴二瑑飾雲龍文描
金白珩而下繫組五貫以玉珠行則衝牙二滴與璜

相觸有聲金鉤二有二小綬六采

黃白赤綠元纁綠

纁質三小

綬色同大綬間施三玉環龍文皆織成韞舄皆赤色舄有黑鈎純以黃飾舄首嘉靖八年諭周臣張璁袞冕有革帶今何不用璁對曰按陳祥道禮書古革帶大帶皆謂之鞶革帶以繫佩韞然後加以大帶而笏搢於二帶之間夫革帶前繫紱後繫綬左右繫佩自古冕弁恆用之今惟不用革帶以至前後佩服皆無所繫遂附屬裳要之間失古制矣帝曰冕服祀天地享祖宗若闕革帶非齊明盛服之意及觀會典載蔽膝用羅上織火山龍三章并大帶緣用錦皆與今所服不合卿可并革帶繫蔽膝佩綬之武詳考繪圖以

進又云衣裳分上下服而今衣恆拊裳裳制如帷而
今兩幅朕意衣但當與裳要下齊而露裳之六章何
如已又諭璫以變更祖制爲疑璫對曰臣考禮制衣
不掩裳與聖意允合夫衣六章裳六章義各有取衣
自不容掩裳大明集禮及會典與古制不異今衣八
章裳四章故衣裳掩裳然於典籍無所準內閣所藏
圖註蓋因官司織造循習訛謬今訂正之乃復祖制
非有變更帝意乃決因復諭璫曰衣有六章古以繪
今當以織朕命織染局考國初冕服日月各徑五寸
當從之裳六章古用繡亦當從之古色用元黃取象
天地今裳用纁於義無取當從古革帶卽束帶後當

用玉以佩綬繫之於下蔽膝隨裳色其繡上龍下火
可不用山卿與內閣諸臣同考之於是楊一清等詳
議袞冕之服自黃虞以來元衣纁裳爲十二章日月
星辰山龍華蟲其序自上而下爲衣之六章宗彝藻
火粉米黼黻其序自下而上爲裳之六章自周以後
寢變其制或八章或九章已戾於古矣我太祖皇帝
復定爲十二章之制司造之官仍習舛訛非制作之
初意伏乞聖斷不疑帝乃令擇吉更正其制冠以圓
匡烏紗冒之旒綴七采玉珠十二青纁充耳綴玉珠
二餘如舊制元衣黃裳衣裳各六章洪武間舊制日
月徑五寸裳前後連屬如帷六章用繡蔽膝隨裳色

維爲之上繡龍一下繡火三繫於革帶大帶素表朱
表上緣以朱下以綠革帶前用玉其後無玉以佩綬
紫而掩之中單及圭俱如永樂間制朱韞赤舄黃條
緣元纓結 皇太子冠服陪祀天地社稷宗廟及大
朝會受冊納妃則服袞冕洪武二十六年定袞冕九
章冕九旒旒九玉金簪導紅組纓兩玉璫圭長九寸
五分元衣纁裳衣五章織山龍華蟲宗彝火裳四章
織藻粉米黼黻白紗中單黻領黻膝隨裳色織火山
二章革帶金鈎黼玉佩綬五采赤白元纁纁綠織成純赤質
三百二十首小綬三色同間織三玉環大帶白表朱
裏上緣以紅下緣以綠白韞赤舄永樂三年定冕冠

元表朱裏前圓後方前後各九旒每旒五采纁九就
貫五采玉九赤白青黃黑相次玉衡金簪元統垂青
纁充耳

用青玉

承以白玉瑱朱紕纓玉圭長九寸五分

以錦約其下并韜袞冕九章元衣五章龍在肩山在
背火華蟲宗彝在袖

每袖各三

皆織成本色領標襍裾纁

裳四章織藻粉米黼黻各二前三幅後四幅不相屬
共腰有褰積本色褕裼中單以素紗爲之青領標襍
裾領織黻文十二蔽膝隨裳色四章織藻粉米黼黻
本色緣有紃施於縫中上玉鉤二玉佩二各用玉珩
一瑀一琚一衝牙一璜三瑀下垂玉花一玉滴二瑑
雲龍文描金自珩而下繫組五貫以玉珠上有金鈎

小綬四采

赤白繅綠

以副之繅質大帶素表朱裏在腰及

垂皆有綽上綽以朱下綽以綠紐約用青組大綬四

采

赤白繅綠

繅質小綬三采間施二玉環龍文皆織成鞢

舄皆赤色舄用黑鉤純黑飾舄首

親王冠服助祭

謁廟朝賀受冊納妃服袞冕洪武二十六年定冕服

俱如東宮第冕旒用五采玉圭長九寸二分五釐青

衣纁裳永樂三年又定冕服皮弁制俱與東宮同

親王世子冠服聖節千秋節并正旦冬至進賀表箋

及父王生日諸節慶賀皆服袞冕洪武二十六年定

袞冕七章冕三采玉珠七旒圭長九寸青衣三章織

華蟲火宗彝纁裳四章織藻粉米黼黻素紗中單青

領襖赤鞞革帶佩白玉元組綬綬紫質用三采

紫黃赤

織成間織三白玉環白鞞赤舄永樂三年更定冕冠前後各八旒每旒五采纁八就貫三采玉珠八赤白青色相次玉圭長九寸青衣三章火在肩華蟲宗彝在兩袖皆織成本色領縹襖裾其纁裳玉佩帶綬之制俱與親王同第領織黻文減二郡王冠服永樂三年定冕冠前後各七旒每旒五采纁七就貫三采玉珠七圭長九寸青衣三章粉米在肩藻宗彝在兩袖皆織成纁裳二章織黼黻各二中單領織黻文七餘與親王世子同

以上明

冕服考卷四終